

研
經
室
集
六









研
經
室
集
六

阮
元
著



中
華
書
局



學經室二集卷三

太傅體仁閣大學士大興朱文正公神道碑

懿夫唐虞之際仲尼致歎堯舜之道孟氏所陳然則際兩朝授受之盛備元輔公孤之隆謨明弼諧非道不言聖天子納所啓沃以爲帝德且極尊師重道之誠徹乎始終乎于中外者非太傅朱文正公曷克膺此公諱珪字石君號南厓晚號盤陀老人元至元閒遠祖福三居浙東明洪武閒德三遷蕭山黃閣河遂爲黃閣河朱氏八傳至公高祖尙綱明末官游擊曾祖必名祖登俊我朝官湖北長陽縣知縣中書科中書父文炳陝西盤屋縣知縣始遷籍于順天大興三世皆以公貴贈光祿大夫太子少保戶部尙書曾祖母白祖母何馮母徐皆一品夫人公以雍正九年正月十二日生于盤屋縣有兄三堂垣筠公祖與高安朱文端公同省爲知縣相友善清名亦相埒公父受經于高安故公十一歲卽傳高安之學年十三丁母艱孺哀毀瘠服除補附學生年十七科試第一舉于鄉與叔兄齊名震都下公卿爭延之次年會試中式賜梁國治榜進士出身改庶吉士習國書座師阿文勤公劉文正公鄂剛烈公皆以學行重之乾隆十六年散館第一授編修明年大考二等授侍講二十三年大考二等授侍讀學士公所撰進文冊陳宮中高宗純皇帝亟賞異之特達之知實始于此二十四年主河南鄉試復命旋奉使告祭南嶽登祝融峯明年

充會試同考官。秋授福建糧驛分巡道。抵閩。兼攝福州府事。毀和合等諸淫祠。民大驚服。二十八年。特旨擢福建按察使。兼署布政司。閩人裘自位。假平臺灣功。鬻武職。獄連數十人。公誅正犯一人。諸受欺者皆不坐。有告家譜妄逆者。識之。僅戮一撰譜者。屍不坐其子孫。二十九年秋。丁父憂。戴星奔至京口。阻風哀號。祭。北風驟轉。抵京。治葬于二老莊。阡三十二年服除。補湖北按察使。時緬甸用兵。公司驛務。無遲誤。無擾累。楚北亂民聚衆。公鞠之。不少縱。然脅從者皆得免。三十三年。調山西按察使。明年授山西布政司。秋奏立保固城工法。令後任隨時修護。如隕在三十年內。與原築官分賠。下部議行。三十六年。暫代巡撫事。奏改吉州爲散州。與鄉寧并隸平陽府。改霍州爲直隸州。以趙城靈石隸之。又奏撥歸化綏遠二城穀十萬餘石。配放兵糧。以省採買。而免紅朽。奏免士獸特蒙古私墾之罪。以所墾無礙。牧地三十一百餘頃。許附近貧苦兵民認耕。納租歲六千餘兩。增官兵盤費。奏太僕寺牧地苦寒。宜改徵本色爲折色。以便民除弊。皆下部議行。三十八年。勘歸化城水災。奏撫卹之。且予修費。借穀種。其民種蒙古之地。并請卹之。三十九年。按察司黃檢奏公終日讀書。于地方事無整頓。明年入覲。授翰林院侍講學士。四十一年。命尙書房行走。侍今皇帝學。時初置文淵閣。官特授公直閣事。主福建己亥鄉試。四十五年。督福建學政。將行。上五箴于今皇帝。藩邸曰。養心曰。敬身曰。勤業曰。虛己曰。致誠。上力行之。及親政。亦常置座右。四十八年冬。還朝。明年扈蹕南巡。授內閣學士。兼禮部侍郎。閱浙江江蘇召試卷。五十一年。授禮部侍郎。主江南鄉試。督

浙江學政五十四年。置蕭山祭田百畝。作圭田記。冬還朝。充經筵講官。五十五年。經筵進講時。諸皇子侍班聽講。高宗純皇帝顧今上曰。此汝師傅講之善。春。總裁會試。秋。授安徽巡撫。命馳驛賑水災。乃攜僕五人。乘小舟與郵民同渡。賑宿碭山靈壁泗五河盱眙民以糧。借懷遠鳳台壽民以糧及種。築決隄六十餘丈。民乃安。復請展春賑。分廠親給于民。五十七年。奏鳳潁水災。恩賞糧種。免民欠萬五千兩。祁門縣築城成。輕騎往驗之。至新嶺。有欲巡撫怒其歛縣令屬掌亭人以饒餬進者。公恬然飽之。五十九年。調廣東巡撫。六十年。兼署兩廣總督。旋授都察院左都御史。兵部尙書。皆留巡撫任。嘆咭喇國入貢。呈土物于總督。卻之。嘉慶元年。征苗。調兩廣兵萬二千。親調遣之。夏。授兩廣總督。兼署巡撫。六月。降旨內召。曰。將欲用爲大學士也。俄以閩浙總督魁倫奏粵東艇匪駛至閩浙。乃公總督任內不能緝捕之咎。寢前命。仍加恩補安徽巡撫。鳳陽等州有水災。蒙恩賑親給之。官吏無敢侵者。時楚豫多邪教流言。安徽有隱伏者。公曰。疑而索之。是激之變也。乃親赴界上籌防禦。徧蒞穎亳等州城鄉。聚長老教勸之。徧張告示。簡明諄切。民大感化。故數年間安徽無以邪教倡亂者。明年授兵部尙書。調吏部尙書。皆留巡撫任。宿靈璧水。合肥定遠巢來安全椒旱。親賑之。民無逃亡凍餒之苦。明年蒙亳復水。卹賑如之。高宗純皇帝上賓于天。今皇帝初親政。卽馳驛召公。公哭且奔。先上奏曰。聞太上皇帝龍馭上昇。膽裂呼天。角崩投地。欽惟大行皇帝十全功德。五福考終。傳器愜心。於昭在上。我皇上純性超倫。報天罔極。竊聞定欲躬行三年之喪。此舉邁千古。

而欽萬世。然而天子之孝。不以毀形滅性爲奇。以繼志述事爲大。親政伊始。遠聽近瞻。默運乾綱。霧施渙號。陽剛之氣。如日重光。惻怛之仁。無幽不浹。思修身嚴誠欺之介。於觀人辨義利之防。君心正而四維張。朝廷清而九牧肅。身先節儉。崇獎清廉。自然盜賊不足平。財用不足阜。惟願我皇上恆久不忘堯舜自任之心。臣敢不隨時勉行仁義事君之道。上嘉納之。及至京哭臨。上執公手。哭失聲。旋命直南書房。管戶部三庫。自是凡國家大政。有所咨詢。皆造膝自陳。不草一疏。不沾直。不市恩。軍機大臣不相關白。公第在外城。遠且隘。賜第西華門。紫禁城騎馬。加太子少保。充實錄館總裁。國史館總裁。己未會試總裁。冬調戶部尚書。時上禁浮收漕米之弊。外省以運丁貧仰資州縣。州縣取民。不得不浮。于是安徽有加贈銀。江蘇有加耗米之請。部議將擬行矣。公思之不寐。綜其數。較原徵加倍。乃決計駁曰。小民未見清漕之益。先受加賦之害。不可行。並令漕司。以後凡事近加賦。皆議駁。以體皇上損上益下之意。長蘆鹽政奏鹽價一斤加錢二文。公駁曰。前蘆東因錢價過賤。已三加價。又免積欠二百六十萬兩。餘欠展三年。商力自寬。且今錢價漸貴。所奏應毋庸議。廣東布政司奏陞濱海沙地賦。公駁曰。海沙淤地。坍漲靡常。是以照下則田減半賦之。今依上中田增賦。是與沿海民計微利。非政體。且民苦加賦。必多坍豁。別有漲地。亦不肯墾。不可行。後倉場衙門復請預納錢糧四五十倍。準作義監生。公駁曰。國家正供有常經。而名實關體要。于名不正。于實有傷。斷不可行。凡駁議皆親屬藁奏。上皆聽之。五年秋。兼署吏部尚書。公之與夫。毆傷禁門兵。免太

子少保。解三庫事。復以彭文勤公墮馬西華門內。公呼其輿入門昇之。違例。議降二級。仍留任。六年陪祀祈穀壇。未曙。誤行墜甬道下。傷左跨。賜醫賜食。絡繹于道。遣內監資硃諭至第視病。詢事。公隨時覆奏。三月小愈。卽趨朝。夏充會典館總裁。閱殿試卷。七年秋。扈蹕潯陽。宣制以戶部尙書拜協辦大學士。仍加太子少保銜。公謝摺云。豈有嘉謨嘉猷。入告我后于內。勉期無欺無隱。仰惟上質于天。八年兼翰林院掌院學士。以原銜充。日講起居注官。春夏皆爲留京辦事大臣。閱大考翰詹卷。九年春。用乾隆九年故事。辛翰林院。先期晉公太子太傅。及幸院。賜宴聯句。御書天祿儲才扁。摹刻院堂。以墨蹟賜公第。公在翰林爲二十四科前輩。資最深。且掌院事。領袖清班。瀛洲典故。盛且榮焉。十年正月。宣制拜體仁閣大學士。管理工部事。上以是命爲遵先帝遺詔也。命詣裕陵謝。明年春。公感寒多痰嗽。步遲蹇。肝火觸右目微眚。上曰。此火盛也。可以游覽散之。乃赴西山呂邨二老莊祭墓。過戒壇潭柘諸寺。秋復祭墓。游西山。時公年七十六矣。九月。奏乞休。上曰。待八十當爲壽。旋命戶部尙書戴公衢享賚。賜詩十韻。及玉鳩杖。諭天寒。閒二三日入直。且俟日出後。至南書房候召對。每召對。則預定召對後期。十一月庚午。寒甚。乾清宮召對畢。降階。忽痰壅歸第。上遣侍衛領醫官來視疾。疾少差。賜假兩月。十二月乙亥。坐外軒作芻獻詩。有云。天道神難測。民心惟一中。知人可安衆。居所自持公。上將親臨公第。丁卯。復命戶部尙書戴公來。夜逾子。痰盛氣微。遽薨。是五日戊寅也。報聞。上震悼。泣諭朝臣。降制曰。大學士朱珪。持躬正直。砥節清廉。經術淹通。器宇醇厚。

蒙高宗純皇帝特達之知。由詞垣擢補道員。洊歷兩司。內用爲翰林學士。特命入直上書房。朕講貫詩文。深得其益。嗣以卿武出任封圻。有守有爲。賢聲益懋。迨擢至正卿。皇考卽欲用爲大學士。朕親政後。召令還朝。在南書房。優直有年。簡任綸扉。深資啓沃。凡所陳奏。均得大體。服官五十餘年。依然素素。家庭敦睦。動循禮法。洵不愧爲端人正士。畀倚方殷。本年入秋以來。因患病稍久。氣體就衰。朕優加眷念。賜杖賜輿。時加存問。朱珪感戀彌殷。時時力疾進內。朕鑒其誠悃。特行給假兩月。俾得安心調養。疊遣御醫診視。冀得就痊。正擬日內親至伊邸宅視疾。茲遽聞溘逝。深爲悼惜。于初六日親臨賜奠。已派總管內務府大臣阿明阿。賚賜陀羅經被。竝著先派慶郡王永璘。帶領侍衛十員。前往奠醑。追維舊學。良用軫懷。著晉贈太傅。入祀賢良祠。賞給內庫銀二千五百兩。經理喪事。其任內一切降革處分。悉予開復。所有應得卹典。著該部察例具奏。己卯。上親臨奠三爵。哭不止。回宮不待內閣擬諡。特賜諡曰文正。復降制曰。昨因大學士朱珪溘逝。業經降旨加恩。因思乾隆年間。惟故大學士劉統勳。蒙皇考高宗純皇帝鑒其品節。賜諡文正。易名之典。備極優隆。顧劉統勳于署總督任內。曾經獲咎褫職。復蒙皇考施恩錄用。至朱珪立朝五十餘年。外而敷歷督撫。內而洊直綸扉。身躋崇要。從未稍蹈愆尤。絕無瑕玷。靖恭正直。歷久不渝。猶憶伊官翰林時。皇考簡爲朕師傅。爾時朕于經書。已皆竟業。而史鑑事蹟。均資講貫。其所陳說。無非唐虞三代之言。不特非法弗道。卽稍涉時趨之論。亦從不出諸口。啓沃良多。揆諸諡法。實足以當正字而無愧。毋庸內閣

擬請著卽賜諡文正。本日朕親臨奠醊。見其門庭卑隘。清寒之況。不異儒素。瞻念遺風。愴懷未已。著于本月初九日。由內務府辦飯一桌。派二阿哥前往代朕賜奠。俟殯送時。派慶郡王永璘前往祖奠。目送以示朕眷懷舊學。哀榮備至之至意。復撰抒痛詩十二韻。命南書房翰林黃公鉞于殯前焚之。壬辰。命禮部尙書承恩恭侯阿拉諡祭。公第距內西華門僅半里許。御蹕時出入。禮不久殯。乃以甲午啓殯。庚子葬于二老莊呂邸舊阡。陳夫人祔焉。明年御製碑文。刻石阡門。上巳日上謁西陵。蹕路距公墓數里。上遠眺松楸。追懷愴惻。命工部侍郎英公和詣墓賜奠。高宗純皇帝實錄成。以公總修八年。賜祭一壇。長子錫經。服滿以京卿用。樟哉上之重賢傳。任名臣。納哲輔之益。隆飾終之典。至矣。非公之清介忠正。師表人倫。上致君下澤民。曷克膺乎此哉。公豐厚端凝。中和醇粹。爲仁若渴。抗義不撓。坦白公誠。絕無城府。于經術無所不通。漢儒之傳注氣節。宋儒之性道實踐。蓋兼而有之。取士務以經策。較四書文。誠心銳力。以求樸學。經生名士。一覽無遺。海內士心。向往悅服。佳士之文。未薦被落者。讀而泣之。才士黃景仁、張騰蛟、死。稱悼之。通人塞士。必揚其名于朝。秦誓一个臣之心。公斷斷有之。公領試事。不受外僚贈遺。不留貧生銀。布政數省。平餘銀鉅萬。悉不取。撫安徽。裁蕪湖關陋規。閩省洋商陋規事發。欽使蒞治。獨公實不受一錢。公官于外。厓岸廉峻。中朝大官。絕無所援。管部事。持大端。不親細事。數十年清操亮節。人皆仰之。公以孝弟爲仁之本。事父愛敬。本于天性。父杖兄跪。而以身蔽受之。勸母氏早歿。事庶母謝幾如母。語子輩曰。古人祭必有

尸仿之以申吾慕。非過禮也。庶祖母李撫公有恩。貤贈一品夫人。事諸兄。悲愉如一體。別則夢見。聚則聯牀。兄之喪。哭之咯血。幾致毀事。寡嫂盡敬。撫諸兄子如己子。三郇故交。靡不周卹。教子孫讀書敦行。皆誠篤。有公之風。公嘗曰。吾三十九歲夜坐。忽腹閒自暖。由脊上貫于頂。甘液自嚥下注。由是流轉。至老不絕。實因自致。非關學力。乃知朱子注參同契。本非虛語。公年四十餘。卽獨居。迄無一妾。御製抒痛詩有云。半生惟獨宿。一世不貪錢。知之深也。公爲文筆。奧博沈雄。國家有大典禮。撰進雅頌詩冊文跋。高宗純皇帝必親覽之。以爲能見其大。頌不忘規。或陳坐隅。或命諸皇子皇孫寫爲副。聖製詩。或寄示命和。公官撫督時。上在書房常頒手札。積一百三十九函。裝六卷。歸朝繳進。上亦書數年懷公詩數十首爲二冊。上册題曰兼葭遠目。下册題曰山海遙思。以示公。公跋曰。臣之蕪陋。何足以當非常眷注。惟有此心不敢欺耳。於大學義利之辨。通鑑治亂之由。天命呼吸可通。民情憂樂無閒。反覆敷宣。不以爲迂闊而遠于事情也。公文集□□卷。知足齋詩集三十餘卷。元請刻公詩。公命元選爲二十四卷。上命以刻本進。賜題七言律詩四首于卷首。公被先帝特賜蟒袍筆墨荷包等物。今上賜大珠綠絳韉黑狐裘袍先帝御用四團龍卦。四開襖袍等物。其餘恩賚多不具書。公配陳夫人宛平人。思南府知府邦勳女。乾隆十四年來歸。有婦德。四十年八月以疾卒。贈一品夫人。生二子。錫經。己亥舉人。一品蔭生。官刑部員外郎。遷戶部郎中。次錫緯。附學生。先公卒。女子子一。適通州馮秉驥。秉驥官張掖縣知縣。孫涂。庚申欽賜舉人。錫緯生女孫一。適萍鄉。

劉元恩。吏部侍郎。劉公鳳。諱子也。錫經生。曾孫三。甘霖。香霖。賁霖。元不才。爲公門生。受知二十餘年矣。會持父服居鄉。公之子書來。命爲碑文。不敢辭。秋。免藥服。當執心喪。敬按年譜及平日所知者。泣爲絃銘曰。星精嶽神。蔚爲帝傅。學正文明。道深性固。先帝任公。決于一顧。授鉞卜臚。久隆知遇。公遇盛時。佐祁輔嬀。君爲堯舜。臣爲臯夔。經邦之道。坐而論之。非帝宣綸。世祕未知。帝曰。調元。資于師相。舊學交修。天工寅亮。溫樹之間。青蒲之上。蒼生被澤。黃扉孚望。公之保民。敷政優優。公之儲材。其心休休。德如霖雨。清比江流。庭不旋馬。路無喘牛。公有恆言。竝舉二事。曰。不嗜殺。曰。不言利。公之講史。長編資治。公之執經。十章衍義。幡然三公。邁榮軼光。乃不慙道。而覲先皇。帝憑和軾。愴眺阡岡。勒碑墮淚。西山蒼蒼。

常生諱案。文正公子。屬家大人撰碑文。磨石以待。家大人以未大祥。不爲領語之文。迺寄數十日。公子追不及待。屬吳學士。並代家大人爲文刊石。及此文到京。而碑已刊矣。

誥授光祿大夫刑部右侍郎述庵王公神道碑

公姓王。諱昶。字德甫。號述庵。以居蘭泉書屋。學者稱蘭泉先生。先世居浙江蘭谿縣。高祖懋忠。遷江南青浦縣。名在幾社。曾祖之輔。祖璵。父士毅。皆以公官累。贈至光祿大夫。刑部右侍郎。母錢太夫人。以雍正二年十一月二十二日生公。公少穎異。博學善屬文。體貌修偉。弱冠爲名諸生。侍父疾。居喪盡禮。服除。豕益貧。作同窮賦。以見志。乾隆癸酉。舉于鄉。甲戌。成進士。歸選班。二十二年。南巡召試。一等第一。賜內閣中書。協辦侍讀。直軍機房。洊陞刑部主事。員外郎。郎中。三十三年。以言兩淮鹽運提引事不密。罷職。時緬甸未

靖。阿文成公以定邊右副將軍總督雲貴。請公佐軍事。遂至騰越。出銅壁關。擊賊江中勝之。緬酋乞降。阿公屬公草檄允其降。班師旋永昌。緬甸貢表久未至。復從阿公如騰越。三十六年。溫公福代阿公移師四川。辦金川事。奉旨授吏部主事。從溫公西路軍進討。溫公屬公作檄斥僧克桑罪。遂克斑爛山。進攻日耳寨。阿公奉詔由北路進兵。兼督南路。公復從阿公軍攻克美美卡。以皮船渡水。克小金川。僧克桑遁。澤旺降。進討大金川。阿公奏公無兄弟。母年七十餘。明大義。勛以殫心軍事。今從軍五年矣。得旨陞員外郎。三十八年。至常噶山。山脊絕險。官兵營壘與賊錯處。且雨雪甚。夏溫公兵潰。木果木。阿公亦退兵至翁古爾壘。時警報絡繹。詔旨疊至。公力疾叱馬懸厓。日行數百里。夜治章奏文書于礮火矢石之中。無誤。無畏。冬。大兵復進。據美美卡。攻大板昭。小金川平。補員外郎。擢郎中。復從討大金川。克勒烏圍刮耳崖。四十一年。三路兵合攻。益急。索諾木等率衆投罪。公草露布告捷。于是兩金川地悉平。公在軍中前後九年。每有所攻克。輒議敘。凡加軍功十三級。紀錄八次。凱旋之日。以戎服行禮。賜宴紫光閣。賞賚優渥。奉旨王昶久在軍營。著有勞績。陞鴻臚寺卿。賞戴花翎。在軍機處行走。秋。擢通政司副使。四十二年三月。擢大理寺卿。十四年。乞歸。改葬光祿公。暨嫡母陸太夫人。依遷葬禮服。總。秋。赴京。冬。授都察院左副都御史。四十五年。授江西按察使。檄府縣力行保甲。禁族祠訟門之習。坐堂皇六十餘日。決獄百餘案。秋。丁母憂。哀毀盡禮。服除。補直隸按察使。調陝西按察使。奏命盜逃犯。宜于定案時速通緝。議行之。逆回田五倡亂。奉命備兵。

長武時賊勢張兵少公試礮巡城籍強壯繕守具民以無恐京外大兵皆過長武用車馬以萬計公飛書草檄立辦之暨乎班師迄無一誤河南亂民秦國棟等戕官奉旨督緝獲之五十一年授雲南布政使雲南銅政繁公盡發故籍著銅政全書示補救調劑之術五十三年調江西布政使五十四年擢刑部右侍郎五十八年乞歸修墓冬還京以病乞休上鑒其老允之諭以歲暮寒俟春融歸明年歸名其堂曰春融堂嘉慶元年以授受大典至京與千叟宴四年純皇帝升遐復至京謁梓宮蒙召見敕建言公密封以進不留草夏歸青浦分賠滇銅鬻田宅以入官居于廟廡朋舊贈遺盡以刻書五年年七十有七重游泮宮十一年年八十有三五月病瘡六月初六日病甚口授謝恩表自定喪禮屬元撰神道碑文初七日雞初鳴公曰時至矣遂卒子肇和以嘉慶十二年春葬公于崑山縣雪霞灣年字圩卽公所自營生壙也公妻鄒夫人祔焉側室許陸黃三孺人亦從葬焉公之扈駕巡山東江浙也古帝王聖賢名臣陵墓祠廟嘗分遣致祭己卯庚辰壬午順天鄉試辛巳癸未會試五爲同考官王子主順天鄉試皆以經術取士士之出門下爲小門生及從游受業者二千餘人又嘗主婁東敷文兩書院欽定通鑑輯覽同文志大清一統志續三通等書奉敕與纂修事又奉敕刪定三藏聖教經咒徧譯佛典深于禪理者不及也前後奉使鞠奏高郵州假印重徵江陵縣偷減隄工等七案公正研求分別虛實高郵州案巡撫府州竝擬罪隄工案以知府草率捏飾効落其職公之爲學也無所不通早年以詩列吳中七子名傳海外初學六朝初唐後宗

杜韓蘇陸。侍讌廣歌。賜賚稠疊。詞擬姜夔。張炎古文力追韓蘇。碑版之文。照于四裔。積金石文字數千通。書五萬卷。所至朋舊文讌。提倡風雅。後進才學之士。執經請業。舟車錯互。屢滿戶外。士藉品藻。以成名。致通顯者。甚衆。公治經與惠棟同深漢儒之學。詩禮宗毛鄭。易學荀虞。言性道則尊朱子。下及薛河津王陽明諸家。居憂不爲詩文。不就徵聘。生平重倫紀。尙名節。篤秉之誠。本于天性。在軍營和平簡易。自科爾沁王以下。皆親重之。爲司寇時。與阿文成公爲舊識。他非所契。嘗訓子曰。易言比之匪人。不亦傷乎。非匪人之能傷。比者自重其傷也。公所著書。春融堂詩文兩集。宏博淵雅。有關于經史文獻。金石萃編。青浦詩傳。湖海詩傳。琴書樓詞。續詞綜。等書。皆刊成。餘若天下書院志。征緬紀聞。屬車雜志。朝聞錄等書。四十餘種。尙待次第校刊之。元居憂。受公遺言。撰碑銘。不敢辭。旣除服。乃爲銘曰。

拘于儒者。不達政事。習尉律者。迷誤文字。惟公兼之。經術爲治。荏弱于文。無能卽戎。折衝千里。于經鮮通。惟公兼之。乃多戰功。尊漢學者。或昧言性。悟性道者。妄斥許鄭。公兼通之。履蹈賢聖。皇熊疏義。拙于文詞。陸沈藻績。樸學不知。華實竝茂。公亦兼之。公爲君子。筮匪不比。沖澹其神。靖共其位。數歷中外。進退禮義。公爲名臣。帝嘉厥功。金川磨盾。紫閣攷弓。獄平政飭。本孝于忠。瞻彼中江。秀鍾峯泖。海內清望。雲間大老。雖不慙道。亦吹壽考。佳城鬱鬱。葭灣之中。杏歸春雨。蒹起秋風。勒銘無媿。碑樹桓豐。

吏部左侍郎謝公墓誌銘

公姓謝諱塘字崑城號金圃又號東墅先世會稽郡人系出晉太傅廬陵郡公後遠祖諱琛一遷嘉善縣之楓涇鎮曾祖諱元一祖諱春芳父諱永輝皆以孝友文學傳其家竝因公貴累贈封爲光祿大夫吏部左侍郎公少穎異舉止端雅如成人讀書不忘究心實學經史百家靡不綜覽乾隆十五年以優行貢太學十六年南巡召試第一賜舉人授內閣中書十七年賜進士出身改翰林院庶吉士授編修辦翰林院事謚翰林院文與繙書房措詞竝誤落職廿四年獻平定回部饒歌復原官在尙書房行走充起居注日講官丙子庚辰順天鄉試癸未會試皆同考官乙酉福建鄉試正考官淳陞授翰林院侍講右春坊右庶子翰林院侍讀學士內閣學士兼禮部侍郎以父憂去官起復拜前官授工部侍郎充經筵講官卅九年提督江蘇學政上東巡狩時兩金川蕩平御製告成太學碑文特賜先睹于是謚平定金川說得旨嘉獎四十三年春調禮部左侍郎會試知貢舉吏不敢欺士皆稱便秋充江南鄉試正考官四十五年復充知貢舉調吏部右侍郎國史館副總裁冬吏部有捐復事公議與大學士阿公不同上從公議四十六年充會試正總裁殿試讀卷上擢錢棨爲一甲第一錢公鄉會兩元皆出公門至是成三元稱盛事四十七年轉吏部左侍郎四十八年充江南鄉試正考官卽授江蘇學政五十一年旋京召問時政公疏言洪澤湖形勢日淺昔如釜今如槃偏災賑恤請改本色爲折色銀由藩司印封給發以防吏弊上諭以折色不能應饑民之急河務命公親往履勘勘知前奏誤請議處奉旨寬免先是大學士阿公以公被江南傳聞考

試不公。對語嘲誚。入告。至是召對訓飭。降補內閣學士兼禮部侍郎。五十四年。京察。以前事革職留任。尙書房各官曠課。上以公在內廷久。尤切責。降補翰林院編修。冬。復命在尙書房行走。和詩賜福字。恩遇如前。公病濕。上遣太醫院堂官臨治。六十年。得旨以原品休致。時公疾日篤。今皇帝暨皇子皇孫遣中使存問。公尙敬詢起居。伏牀叩首稱謝。四月卒。距生于康熙五十八年九月。春秋七十有七。累階至光祿大夫。公至性孝弟。居親喪。哀毀骨立。及通顯。每遇晉階。輒以悲繼喜。逢諱日。未嘗不涕泗交頤也。公事貴以禮待下。不驕。大學士傅文忠公以禮聘授館。額駙尙書忠勇公暨文襄王。皆沖齡請業。公九掌文衡。而江南典試者再。督學者再。論文不拘一格。皆衷于典雅。經義策問。尤急甄拔。丁酉拔貢科。所選皆孤寒。尤重江都汪中容甫。汪強記博聞。才氣橫發。貧困未知名于時。公語人曰。予之上容甫。爵也。如以學。予于容甫北面矣。其不惜自貶以成人名如此。公再督學。元始應童子試。公獎勵極力。居公第讀書數年。高郵李進士惇。嘉定錢進士唐。山陽汪侍講廷珍。儀徵江侍御德量。通州胡學士長齡。陽湖孫觀察星衍。甘泉焦明經循。金匱徐孝廉嵩等。識拔不可勝數。是以江淮南北。懷經握槧者。靡不服公之學。願得若公其人者。再洊爲幸。公所著安雅堂文集十二卷。以經史小學爲本。雖心好沈博絕麗之文。而擇言必雅。國家有大慶大功。雍容揄揚。擬諸雅頌。安雅堂詩集十卷。格律凝重。直溯盛唐。東豎少作及存稿四書義二卷。典麗獨絕。尤深文律。六書正說四卷。發明三代造字本義。詮證秦漢諸儒之說。刊正二徐鄭樵戴侗楊桓周伯琦等

謬誤。尤好鐘鼎古文。獨追象形象事象意之本。謂許慎篆文。乃沿秦石刻結體。校以商周尊彝。岐陽石鼓。則形事意三者。皆所不及。指微抉奧。令人解頤。形聲轉注假借三事。亦博探倉雅。出入經訓。故公之爲小學也。依據許氏而更溯其本。又嘗校正荀子楊倞注。逸周書孔晁注。合之盧學士文昭所校。鈐板貽學者。公初娶費夫人。贈一品夫人。繼娶金夫人。封一品夫人。子五。昌鑒。庚寅舉人。蚤卒。恭銘。庚子舉人。丁未進士。改翰林院庶吉士。候選八品京官。揚鎮。欽賜舉人。應鑄。捐職州同知。卒。慶鍾。太學生。女二。孫八。江字澄。淮。河。漢。濟。泗。伏保。乾隆六十年十二月二十日。公子恭銘等。葬公于嘉善縣四中區藏字。圩夫人附焉。時元督學浙江。敬勒銘曰。

吳越之間。靈秀所鍾。仁惠之後。必大厥宗。懷毓純篤。實生我公。我公孝弟。稟于幼冲。推以事君。迺克竭忠。帝曰汝才。既博且鴻。用汝于文。黼黻邦隆。臣殫厥學。庶拜禁中。五花書鳳。九章繪龍。其文誠誠。其光熊熊。秉鑑景徹。物無遁容。氣伸雋異。淚感孤窮。士敦經術。皆公之功。惟帝育臣。千石代農。惟帝教臣。協恭和衷。惟帝愛臣。恩周始終。臣形雖阻。精誠尙充。詩書雒誦。子孫其逢。林泉岡道。佳城穹窿。雲飛桓表。日冷高松。靈書漆簡。題湊共封。敬勒貞石。納諸幽宮。

刑部侍郎唐山阮公傳

阮公諱葵。生字寶誠。號唐山。淮安山陽人。先世自明初由清江以武功隸大河衛。七世祖嘉林。宰益陽。舉

循吏第一擢監察御史曾祖晉縣學生與同邑閻百詩應鴻詞徵祖應韶監生父學浩翰林檢討兩世皆以公贈通政司參議公生之夕父夢客以寶石贈故小字寶石六歲就外傳不好弄七歲孝經周易諸經已成誦隨父入京師與弟芝生齊名有淮南二阮之目乾隆壬申舉於鄉偕弟就學於天台齊宗伯息園辛巳會試取中正榜授內閣中書充方略通鑑輯覽兩館纂修官軍機司員處行走緬甸不靖軍書旁午公入直甚勤秋扈蹕木蘭會京師割辦案起蔓延各省公虛心推鞠日一具奏大端以爲本無其事妖言由是漸息三十六年補刑部主事時總理刑部者爲諸城劉文正公久於樞廷識公才告同列曰阮某選西曹總識事有人矣明年兼雲南司總辦秋審三十九年鞫山東亂民王倫脅從至部者無枉縱升員外郎四十一年升郎中時有弟殺兄牛而兄故殺弟者議者以爲弟是罪人兄爲尊長公判曰弟殺兄牛本非盜賊兄刃弟頸實喪天良竟抵罪浙江捕盜船事有以內洋改外洋者大吏均擬絞公判曰法嚴首惡律重誅心千總據實報聞其情輕都司代改招詳其情重概擬絞不可且非稱與同罪律義千總改擬流又有兄被殺而父受賂私和弟首其事證父以賄擬徒公判曰爲兄洩憤手足之誼雖全陷父充徒恩義所傷實重使依前擬不特父不能無憾於子子亦何能一息自安應改子首如父自首例令其弟代父充徒則無媿兄弟之義亦不賊父子之恩矣會有議復讎例宜刪除者軍機大臣集議公撰議稿曰查律載父母祖父母爲人所殺子孫不告官而擅殺行兇人者杖六十其卽時殺死者勿論少遲卽以擅殺論細

釋律意。登時殺死。勿論者。蓋子孫當場目擊怨憤。不惟不暇告官。並不及慮。已擅殺。故得勿論。至少遲則仍是登場目擊怨憤。故予以杖六十。皆原其倉卒不告擅殺之罪也。若既逾時到官。有司不爲昭雪。或勢豪稽誅。兇手詭脫。子孫含憤操戈。乘隙刺殺。則所仇者實爲應抵之人。其所復者亦有應得之罪。但國家明罰敕法。冤無不伸。律文雖載。引此者稀。縱有一二藉口報仇者。然國法已彰。私仇卽泯。假如其父之冤旣伸。其子卽無仇可復。所殺非應抵之人。則於法無可寬之律。擬以謀殺。定入情實。原爲罪所應得。至於律文相沿已久。自當仍舊。以俟法外之仁。庶幾情與律兩得其平矣。卒如其議。公之理刑允正類若此。四十五年。京察一等。改監察御史。部臣以刑名諳習。請留部。會有疾。請假南歸。四十七年冬。入都。先是。部臣奏公名。上曰。秋審近當促之來。及至。補監察御史。十二月。特旨以四五品京堂用。擢通政司參議。五十年。審釋監禁待質之犯。特命專其成。四月。超擢刑部右侍郎。九月。辦秋審。平允。復邀褒獎。五十二年。扈從灤河。覆校文津閣圖書。命和詩三十餘首。時臺灣逆首林爽文執至部。公侍廷鞠。晝夜無少閒。而校書和詩如常。五十四年二月二十一日。以疾卒。年六十有三。先是。公父修。淮安學廟畢。設灑掃會。諸生日聚一錢。爲修廟資。至公時。歲有餘。公爲置田名一錢莊。立規條二十。以期久遠。在京師建淮安西館於橫街。居鄉修勾湖草堂。汎舟湖上。歌誦先芬。總漕楊清恪公。改置麗正書院於城東。屬公董其事。院成。出藏書數百種。畀諸生讀焉。公性孝友。篤於宗族。尤好獎掖後進。與錢辛楣。程魚門。諸君交。京邸設消寒吟秋兩

會爲詩酒社。平居廉介清潔。門無雜賓。退直後青鞵布襪。如諸生時。暇則讀書自娛。古文章疏。於宣公溫公韓范諸公外。尤愛范忠宣胡文恭詩賦。出入漢魏六朝。而以流麗爲主。晚乃訂其詩文爲七錄齋集。二十四卷。茶餘客話三十卷。阮氏筆訓族譜若干卷。子鍾琦。鍾璟。孫以立。以言。論曰。公治刑。以明察平允。見稱於時。然其神智所開。乃自唐宋諸賢奏議而來。故能持大體。不爲苛細。公卿之異於刀筆吏者。在此。

山東糧道淵如孫君傳

孫君諱星衍。字淵如。江蘇陽湖人。明功臣燕山侯興祖。諡忠愍。禮部尙書愼行。諡文介。之後。曾祖謀。康熙辛未進士。禮部郎中。祖枝生。父勳。乾隆丙子科舉人。官山西河曲縣知縣。君河曲長子也。君生時。大母許大夫人夢星墜於懷。舉以授母金夫人。比旦而君生。君幼有異稟。讀書過目成誦。河曲授以文選。君全誦之。及長。補學生員。與同里楊君芳燦。洪君亮吉。黃君景仁。文學相齊。袁君枚。品其詩曰。天下清才多。奇才少。讀足下之詩。天下之奇才也。遂相與爲忘年交。君雅不欲以詩名。深究經史文字音訓之學。旁及諸子百家。皆心通其義。錢少詹事大昕。主鑑山書院。與君講學。又極相重。會陝西巡撫畢公沅。以母憂居吳門。起復。聞君名。遂同入關。西安幕府初開。好賢禮士。一時才人名宿踵至。君譽最高。畢公撰關中勝蹟志。山海經注。校正晏子春秋。皆屬君手定。乾隆丙午科。大興朱文正公典試江南。文正在都。與彭文勤公約曰。

吾此行必得汪中孫星衍公搜落卷。得其經文策。曰：此必汪中也。及拆卷得君名。而汪實未就試。丁未以二甲第二賜進士及第。授翰林院編修。充三通館校理。己酉散館。君賦厲志賦。用史記駒駒如畏。和相國珣。疑爲別字。置二等。引見。奉旨以部員用。故事：一甲進士改部。或奏請留館。時相國知君名。欲君屈節一見。君卒不往。曰：吾寧得上所改官。不受人惠也。遂就職。又編修改官。可得員外。前次吳文煥有成案。或謂君一見相即得之。君曰：主事終擢員外。何汲汲求人爲。自是編修改主事。遂爲成例。補刑部直隸司主事。總辦秋審。君所居埽室焚香。爲諸名士燕集之所。高麗使臣朴齊家入貢。在書肆見君所校古書。特謁君。爲君書問字堂扁。賦詩以贈。乾隆五十六年轉員外。次年春。扈蹕五臺。越年扈蹕天津。會大風。御舟阻。上改肩輿。至行宮。君約同僚步行。舟里赴宮門辦事。上特賜緞。五十九年陞廣東司郎中。相國阿文成公大司寇胡莊敏公。皆器重君。每有疑獄。輒令君依古義平議行。君執法求平。所平反全活甚多。甲有竊主財逾貫。詣其友乙。匿其數以告。分金而逸。事發。乙得知情。藏匿罪人。減等罪。應流。君以爲律稱知情則坐。乙不知滿貫也。應以所知數坐。減問徒。大司寇詰以乙所言無實證。如獲甲。言實告以逾貫。奈何。君言：此名例所謂通計前罪以充後數也。乙卒減徒。君又言：律文稱囚者在繫之名。稱罪人者。犯事在官之名。今或未到官。名之罪人。或藏匿罪人。問擬縱囚。非正名之義。湖廣有子護嫁母傷人至死獄。勅下法司議。或以嫁母期服減于母。則護嫁母不得與母同科。君以古者父在爲母亦期。屈于所尊。嫁母服期。因宗子主祭。

非謂情當殺也。引宋王博文請封嫁母又爲行服。謂子無絕母禮。又引唐八座議凡父卒母嫁有心喪三年之制。子無絕道故也。護嫁母出母俱當與母同議。減鬪殺罪。甲有馳車犯乙死者。已當過失殺罪。甲恐以無故馳驟車馬獲重罪。介所知以兼金求免。君曰。吾不受暮夜金。君罪止過失殺。無爲人所誑也。甲慚謝去。有孝子爲父報仇殺縣役。坐死。其父誣控部。弟實爲縣役逼斃。請檢尸傷。當道某屬託君。君曰。吾豈能枉法殺孝子哉。其持正類此。五十九年。京察一等。次年五月。奉旨授山東兗沂曹濟道。君以濟陰湯陵書傳所傳。即在曹南。其山西榮河湯陵雖列祀典。實宋以來傳譌之迹。因徧考諸書。據漢崔駰。魏皇覽。晉伏滔。湯陵在濟陰之說。移山西布政司。並考榮河之陵出後魏小說家言。張恩破陵得銘。附會殷湯。未爲典要。宜改正。申大府。後君再官東省。曹縣令卒爲修整湯陵廟屋。以祭田奉祀。立碑紀事。嘉慶元年七月。曹南水漫灘潰。決單縣地。君偕按察使康公基田築塞之。君鳩工集夫。五日夜從上游築堤遏禦之。溜歸中法。不果橫決。康公語君曰。吾治河數十年。未見以決口能卽堵閉者。惟曹南之役。吾與君成之。省國家數百萬帑金矣。時巡撫王德公調任浙江。上以山東新任按察使張長庚在軍營不能來東。命新撫伊江阿會同舊撫舉道員中能勝臬事者以聞。兩撫以君名入奏。奉旨署按察司事。君下車日以整肅吏治爲己任。親問囚定爰書。矜慎庶獄。甲與乙有姻共飲。乙醉墜火炕。吐燒酒引火。餓灼爛至死。甲醉臥不知。鞠獄。甲以奪壺斟酒有爭鬪形。擬鬪殺罪。君曰。甲主乙賓。奪乙壺勸之飲。名奪實讓也。改甲坐過失殺。出其

罪有婦因姦謀命獄。其婦某家妾。夫遠出。主母惡之。會僕婦死。誣以謀毒。問官又實以姦夫言。婦淫。主婦令僕婦守之。惡而行毒。已具獄。君鞠婦以某日歸寧。僕婦後二日以子殤與夫爭。忿自盡。出冤婦於獄。因有共毆人至死過堂呼冤者。自言本繹夫。見所過有衆共毆人。勸止之不從而去。越數月。邑令始拘訊之。酷刑誣服下手毆人。君詰以衆中有相識者否。答以有舅氏某。爲縣役。在旁知狀。密拘縣役詰之。乃因姦殺人。縣令回護。聽其屬甥認罪。始以鬪殺傷輕緩其死。上司駁詰。改擬傷重入實。囚知死。乃不承。君告縣官。乃以失察處分枉人命。吾爲子救正陰禍也。有詬罵婦女致死獄。君以事在一月前。不得謂之忿激。鞠得婦自與夫毆。冒自經狀。出生罪。凡權臬七越月。平反數十百條。活死罪誣服者十餘獄。亦不以之罪縣官。云縣官實不盡明刑律。皆幕僚誤之也。山左風氣爲之一變。君又以先儒伏生承秦蔑學之後。壁藏尙書。唐虞三代載道之文。得以不絕。鄭司農康成箋注易詩書禮論語孝經。可比七十子身通六藝。皆宜建立。五經博士後。大吏奏請。鄭被駁而伏准行。其議實自君發也。濰縣有武人犯法。挾厚力求脫。令不可干。因賄通和門屬託大府。君訪捕鞠之。械和門來者於衢。巡撫奏言。河防任重。宜令君回本任。上俞之。君回。袞沂曹濟道任時。各屬感君廉正。卻陋規。相率斂費贈君。君不納。五月赴工。秋。江南豐工及山東曹工同時漫溢。君以無工處所得疏防咎。大府加之嚴議。上以兼管官特予留任。君外補時。有勸加級以防降調者。君曰。吾安命。故事道員嚴議無特旨予留者。蓋異數云。曹工分治引河三道。君與濟東道署登萊道各

治二十里。君所治中段，廣深中程。君察弊嚴，不煩擾，不染指。畢工，校上下段，引河共省三十餘萬兩。官民比他處得蘇息。凡河工堵築決口，須于將合龍時，放引河，則水疾下而無停淤。時隄未大塞，而巡撫欲放引河，康河帥力止之，不得。既放水，河盡填淤，于是又抽溝，而曹工遂不能合矣。四年二月，大府奏稱君熟習刑名，操守廉潔，辦理地方事務皆裕如。惟河務非其所長，請以君留補地方道。奉旨允準。先是，河工分賠之員，或得羨餘，謂之扣費。君不取，悉以給引河工費。仍取領結存庫。是時曹工尙未合，河道總督巡撫亟奏合龍，移君任。尋又奏稱合而復開，開則分賠兩次，壩工銀九萬兩，當半屬後任。而司事者并以歸君。君亦任之曰：吾無寸椽尺土，然既兼河務，不能不爲人受過也。六月，君丁母金夫人憂歸里，僑居金陵祠屋。六年四月，元撫浙，建謁經精舍於西湖之濱，選督學時所知文行兼長之士讀書其中，與君及王少司寇昶迭主講，命題課業。問以經史疑義，旁及小學、天部、地里、算法、詞章，各聽搜討書傳條對，以觀其器識。諸生執經問字者盈門。未及十年，而舍中士登巍科、入館閣、及選述成一家言者，不可勝數。君澹於宦情，又以大母老，是以服闋後，遊吳越間數年，終以追河工賠項急，不得已再出。九年，至都，吏部奏請奉旨仍發山東，以道員用。十年，委署登萊青道。補山東督糧道。十一年，許太夫人卒，君哀慟過禮，乞假三月。委知州代行公事。山東衛河經臨清閘口，夏秋水漲，高於閘內之汶水，卽閉閘，謂之閘口糧艘阻滯。君知德州哨馬營及恩縣四女寺，舊有兩支河合流入老黃河，卽鈎盤鬲津故道，經樂陵至海豐入海，請開濬以洩。

衛水異漲。德州舊設滿營駐防官兵五百口。一口爲一戶。增至二千七百餘口。而額餉無可加。每年例支道倉米七千八百餘石。內有折色米三千餘石。每石支銀一兩。糧價昔賤今貴。折色不敷半石之數。官兵日苦累。道倉支剩餘米。歷年運交通倉者。官丁運費共需米銀二千餘兩。君請以存給官兵本色除折色。不獨恤滿兵。又省運費。皆准行。十二年六月。署布政司印。值部使廣少司寇興。在省按章供張煩擾。君慎守帑項。不肯妄支。事竣北行。君獨無所餽。後廣以賄敗。豫東兩省以支庫獲罪者衆。君不與焉。十三年。君督運北上。隨漕入覲。請訓。上知君甲第。及詢在部在東年月。畢。面陳乞假三月。省迎老父于江南。上允行。秋至江寧。與族人置田爲孫子祠。肖孫子及齊將贖象。又擇祠西鐵佛庵廢屋故址。爲許太夫人建旌節專祠。十月始回任。自郟城取道費縣。訪季桓子得獐羊井。銘於縣署。又屬縣令訪曾點南城葬處。及澹臺子羽墓。立碑季桓子井上。君官竟沂道。暨權按察時。嘗考太平寰宇記。先賢閔子墓在范縣東。知今所傳在歷城者。爲後世之誤。曾檄縣令訪求遺墓。迨嘉慶八年。再至東省。以察賑。按行范縣之墓所在。會河溢。不能詣謁。及官糧道。忽夢浚井出古丈夫布衣泥塗狀。自稱閔子。覺而異之。因出貲屬縣令訪視廢墓。申禁採樵。華亭唐晟宰是縣。以修祠堂門垣栽種柏樹申報。乞君爲文紀事。並訪義士左伯桃羊角哀墓於縣之義城寺東。乞君考其事。以存志。乘十六年七月。君引疾歸。十九年。應揚州阿鹽使聘。校刊全唐文。二十一年。主講鍾山書院。先是君父陽曲以君貴。封中憲大夫。又加封通奉大夫。君早年文辭華麗。繼乃沈

潛經術博極羣書。勤於著述。性喜獎借。後進所至之地。士爭附之。又好聚書。聞人家藏有善本。借鈔無虛日。金石文字。揚本古鼎彝書畫。靡不考其源委。其所爲文。在漢魏六朝之間。不欲似唐宋八家。海內翕然稱之。君嘗病古文尙書爲東晉梅賾所亂。官刑曹時。卽撰集古文尙書馬鄭王注十卷。及逸文三篇。歸田後。又爲尙書今古文注疏卅卷。蓋積二十餘年而後成。其精專如此。其餘撰集。有周易集解十卷。夏小正傳校正三卷。魏三體石經殘字考一卷。倉頡篇三卷。孔子集語若干卷。史記天官書攷證十卷。寰宇訪碑錄十二卷。平津館金石萃編二十卷。孫氏家藏書目內編四卷。外編三卷。續古文苑二十卷。問字堂文稿五卷。岱南閣文稿五卷。五松園文稿一卷。平津館文稿二卷。古今體詩若干卷。其所校刊者。有周易口訣義六卷。尙書攷異五卷。春秋釋例十五卷。孫子十家注十三卷。元和郡縣志四十卷。景定建康志五十卷。唐律疏議三十卷。其餘篇簡小者。不可勝數。君以嘉慶二十三年正月十二日卒於江寧。距生於乾隆十八年九月初二。得年六十有六。君妻王夫人。名采薇。工詩善書。早卒。君訂其詩爲長離閣集。君初以弟星衡子鑣爲子。後君側室金氏又生子廡。俱幼。元與君丙午同出朱文正公之門。學問相長。交最密。知君性誠正。無僞言僞行。立身行事。皆以儒術。廉而不刻。和而介。屢以諤諤者不獲乎大府。于其卒也。海內學者皆悼慕之。元爰爲傳。且贊曰。

君爲儒者。亦爲文人。以廉爲孝。以直爲仁。執法在平。布治以循。測學之海。得經之神。人亡書在。千載常新。

循吏汪輝祖傳

君姓汪名輝祖字煥曾號龍莊晚號歸廬浙江蕭山人父楷官河南淇縣典史娶方氏無子側室徐生君方卒繼娶王君生十一年而孤王與徐撫且教世稱汪氏兩節母君才識開敏年十七知縣學生員練習吏事前後入諸州縣幕佐人爲治疑難紛淆一覽得要領尤善治獄平情靜慮侔境揣情多所全活以其暇讀書年三十九舉於鄉又七年成進士需次謁選得湖南永州府寧遠縣知縣縣雜徭俗積逋而多訟前令被訐去攝者政姑息黠者益伺間爲挾持地流丐強橫勢洶洶君下車卽掩捕其尤而驅餘黨出境徵賦期迫君用書告民剴切誠至民讀之慚且感相戒無負好官不逾月而輸賦足額治事廉平尤善色聽剖條發蘊不爽輕重及其援据比傅惟義所適律之所窮通以經術所決獄辭不可殫述人藉藉頌神明而君益欲然聽辭畢輒問堂下觀者曰允乎僉曰允矣遇罪人當予杖呼之前曰若律不可追然若受父母膚體奈何行不肖虧辱之再三語罪人泣君亦泣或對簿者反代請得保全去卒改行爲善延見紳耆問民疾苦四鄉廣狹肥瘠人情良莠皆籍記之然後教民多種殖知禮讓惜廉恥誠昏禮之費而民知儉禁喪禮之酒而民知哀鄙儻之俗翕然丕變歲以大稔復行鄉飲酒賓興禮祭建節孝祠行保甲政聲大播他邑有訟聞移君鞠之則喜寧遠當食淮鹽而鄰境多食粵鹽淮鹽直數倍于粵民多食粵私大府

遣營弁微服偵捕人情惶擾。君爲帖白上官。請改淮引爲粵引。久之未報。君引例張示諭民。零鹽不及十斤者聽。偵弁謂君故縱私。聞於總督。君復揭辨。謂縣官當綏靖地方。張示諭民。勢非得已。揭上。總督鎮洋畢公沅。大嘉賞。立弛零鹽之禁。時偉其議。稱莽知縣云。官事遠未及四年。以足疾自劾。免。時大吏已疏調君善化。疑君詭疾有所避。竟坐是奪職歸。民空邑。走送境上。老幼泣擁輿不得行。君歸里。值西江塘告險。塘關數邑田利。巡撫覺羅公長麟吉慶先後遣官勸君董其事。不獲辭。興事任工。初定費錢二萬八千九百緡。用君議增工倍之。而省錢六千三百餘緡。工用堅實。君一渡江。謝巡撫。歸而閉戶積書數萬卷。不問外事。暇輒手自讎校。以譔述課子孫。嘉慶元年。詔舉孝廉方正。邑人以君應。君辭。君少尙志節。老而愈厲。持論挺特。不可屈撓。而從善如轉圜。嘗自謂生平得力在喫緊爲人四字。故其自治汲汲孳孳。不予以暇。性至孝。痛父早歿。兩母孤苦。撫己成立。撰父母行狀。乞天下能文章者。以沒身爲期。凡傳誌銘誄賦詩數千百篇。彙爲雙節堂贈言集。多至六十二卷。自以孤子所繫甚重。故終身於守身之義。凜凜自防。罔敢隕越。官私一介不取。而不以所守自矜。有譽之者。君怫然曰。爲淑女塞修。而稱其不淫。可乎。爲文質而有法。詩寄興深遠。大達於史。留意名姓之學。讀書貫通大義。凡所論述。期實有濟於用。所交多老宿。以道誼文章相切劘。所著書有元史本證五十卷。讀史掌錄十二卷。史姓韻編六十四卷。九史同姓名略七十二卷。二十四史同姓名錄一百六十卷。二十四史希姓錄四卷。遼金元三史同名錄四十卷。龍莊四六稿二卷。

紀年草一卷。獨吟草一卷。題衫集三卷。辛辛草四卷。岫雲初筆二卷。楚中雜詠四卷。歸廬晚稿六卷。汪氏追遠錄八卷。越女表微錄七卷。善俗書一卷。庸訓六卷。過眼錄二卷。詒穀燕談三卷。其尤著者。有學治臆說四卷。佐治藥言二卷。嘉慶十二年。年七十有八。卒。子五人。長繼芳。丙午舉人。第四子繼培。乙丑進士。吏部主事。

論曰。天下雖大。州縣之積也。州縣盡得孝廉者治之。則永治矣。余讀學治臆說。佐治藥言。未嘗不掩卷太息。願有司之治若汪君也。余撫浙。嘗行其書于有司。權撫河南。復刊布之。士人初領州縣。持此以爲治。雖愚必明。雖柔必強。是故學與仕合。濟于實用。其道易知。其迹易由。其事盡人能之。而其業亦終身莫能竟。君循吏也。然孝子也。廉士也。嗚呼。良吏之所以必舉于孝廉者。觀于汪君。其效不益可觀哉。

蔣士銓傳子知廉

蔣士銓。字心餘。一字蒼生。號清容。

王昶將君墓志

其先爲錢氏。自浙江長興。遷江西鉛山。始姓蔣。

翁方綱蔣君墓志

父堅有

奇節。

袁枚蔣君墓志

士銓生四歲。母鍾。授以四子書及唐人詩。

王昶將君墓志

斷竹蔑爲波磔點畫。攢簇成字。教之。十一

父縛之馬背。遊太行。

金德瑛忠雅堂文集序

讀鳳臺王氏藏書。

王昶將君墓志

冠而歸。

金德瑛忠雅堂文集序

補縣學生。學政以孤鳳皇稱

之。

王昶將君墓志

士銓天稟英絕。有覽輒記。握筆如天馬怒馳。超塵絕迹。丁卯舉於鄉。甲戌考授中書。丁丑成進

士入翰林散館第一授編修居官八年乞假養母歷主講蕺山崇文安定三書院灑然有終焉之志士銓初入京師才名藉甚裴文達薦士銓與彭文勤江右兩名士以故上屢問士銓賜文勤詩并及士銓名士銓感上恩袁枚蔣君墓志母沒服終入京引見以御史用旋患風痺還南昌士銓身長玉立眉目朗然嶽崎磊落

遇忠孝節烈事輒長歌紀之淒鏘激楚使人雪涕王昶詩話生平無遺行志節凜凜以古丈夫自礪金鑄琰忠雅堂文集序

遇不可於意雖權貴幾微不能容其胸中非一刻忘世者趨人之急若鷺鳥之發恩繆寡者艾無所靳袁枚

蔣君墓志詩古文詞負海內盛名王豫菴雅集小序而最擅長者莫如詩當其意緒觸發如雷奮地如風挾土如熊咆

虎哮鯨呿鰲擲山負海涵莫可窮詰古詩勝於近體七古又勝於五古蒼蒼莽莽不主故常如昆陽大戰雷雨交作又如洞庭君吹笛海立雲垂實足開拓心胸推倒豪傑王昶蔣君墓志高麗使臣餉墨四笏求其樂府

以歸袁枚蔣君墓志卒年六十一王昶蔣君墓志所著古文詩若干卷銅絃詞二卷填詞九卷袁枚蔣君墓志士銓長子知廉字

修隅由拔貢生就四庫館膳錄議敘州同知署山東臨清州州同遇秋雨水災奉旨振濟知廉親履勘乘小艇霜行草宿者三旬得水腫疾吟五言絕句四章而卒年四十有弗如室詩集梁同書蔣修隅墓志詩得家法吳照

常生按。此用國史補林傳集句之
法。彙之以備編文苑傳料者也。

孽經室二集卷四

壯烈伯李忠毅公傳

李忠毅公名長庚字西巖福建同安人曾祖思拔祖宗德父希岸公生而倜儻警敏甫入塾卽弄筆書天生我材必有用七字性至孝母喪旣除益讀書習騎射乾隆辛卯科武進士藍翎侍衛屢扈蹕乾隆四十年年二十六補浙江衢州都司累遷提標遊擊太平參將樂清副將林爽文亂臺灣閩中求良將於浙提督陳大用以忠毅應遂入閩護海壇鎮總兵掩捕南日湄洲之賊數十人餘黨解散會鄰海有民船被盜誤指海壇者被參革職忠毅出家財募鄉勇率子弟操舟出擒盜首林權等數十人又擊盜陳營於大岙盜善火器忠毅迴舟據上風以長竿繫月鏹斷其帆繚須眉皆燎躍入盜船斬獲以歸福郡王平臺灣歸加禮善遇之檄郡縣曰李某用火藥所在支與之海盜林明灼陳禮禮等入浙戕參將張殿魁總督屬忠毅捕之遂獲之奏功以遊擊起用五十五年署銅山參將選錄自隨作商人裝屢獲賊明年丁父憂去官五十九年補海壇遊擊仍留銅山六十年安南夷艇始入閩閩人驟駭忠毅以小船入擊之三澎救商船賊舍商拒兵忠毅麾兵伏船內待賊礮盡過賊東發一礮碎其舟餘盜夜相逼公計寡不敵乃以八船首尾緝爲一詰旦賊束來則以東一舟應之至八西來亦如之迴環至暮賊乃去嘉慶二年授澎湖副將

定海鎮總兵純皇帝召見諭曰汝勤于捕盜故有此授三年至定海時定海累更盜患艇夷登岸劫擄婦女官士嬰城至是始有所恃夏擊盜于衢港窮追入山東界獲之秋攻盜于普陀明年秋擊盜于潭頭皆斬獲無算秋閩盜鳳尾引夷艇入浙共百餘艘忠毅追擊至温州沈其一艇守備許松年等三船困于賊忠毅返舟入賊圍救出之窮追至廣東甲子洋遇蔡牽再擊之總督玉德巡撫阮元奏其事奉旨李長庚奮勇爲賊所畏懼此次追剿洋面風濤亦不得不稍爲持重李長庚爲傑出之員總宜用于要處弗令往返奔波徒勞無益復奉旨賞戴花翎五年五月至寧波與巡撫阮元提督蒼保議造大艇船三十以攻夷盜六月夷盜大小七十船復入浙阮元謂賊多非會剿不可會剿非有謀勇者爲統帥不可于是奏以忠毅爲總統得旨允行忠毅既統水師遂條申軍令曰一定海鎮船居中軍用黃旗總領用五色方旗黃溫二鎮居左用紅旗總領用五色尖旗閩鎮居右用白旗總領用五色尖旗一中軍船畫行插五色旗黃溫三燈將領二燈弁兵一燈中軍船起頭篷之後掌進號一次者紅旗行二次者白旗行三次者黃旗行一遇賊船無論何鎮先見者即插本色旗使後船見之仍視中軍所持五色方旗所指前後四方隨指追攻若中軍掛五色旗于大篷者收兵一各鎮雖分三色旗又于本色旗心黏他色以別其隊何隊犯令即罪其領隊者一中軍船高插五色旗者收壘夜中軍船放火號三枝各總領二弁兵一亦收壘支更譙警夜見有外船近者鳴金一陣各船互傳見盜近乃擊之毋遠而亂若收壘旋須行者中軍插三色旗各船毋

放杉板船入海。一遇大盜。宜安靜。前後左右以旗進退之。遲者亂者。按以軍法。旣追盜。盜返篷擊我。我毋避。如有船陷賊。本隊遲救者。罪其長。一追捕遇無風時。必加櫓。若心怯將篷。或鬆或緊者。罪之。前船若速。必回待後船。後船不加速而亦回住者。罪之一。泊舟。各總領船插黑旗。禁縱兵上岸。一中軍傳將備出黃旗。傳千把外委出藍旗。傳隊目舵工出紅旗。一兵船獲盜船。以盜賊物爲賞。兵船過礁門。必魚貫爭先者。罪舵工。六月安南夷艇鳳尾盜六千過閩入浙。逼台州松門。將登岸。巡撫阮元勒兵于太平松門擊之。二十二日。忠毅率師至海門。將會黃巖鎮謀攻取。夜颶風起。明日風益甚。盜船覆溺于松門外。僅餘二三船。漂出外海。海門兵船亦多損。忠毅船隨潮溢入田。挂木而止。賊在松門。據破船及泗水登岸者。黃巖鎮率松門兵縛樗合水陸悉攻俘之。獲安南四總兵印。及僞爵侯倫貴利碟之。又獲安南王勅。擲還安南。自是夷艇不復入浙海。秋忠毅以夷寇雖滅。閩盜尙有水澳。蔡牽乃修船往來閩浙間。屢獲劇盜李出丁郭林俊新楊烏李車黑陳帖李廣高英等船。冬擢福建水師提督。總督玉德以忠毅福建人。奏請迴避。奉旨調浙江提督。六年新艇成。忠毅入閩。駕歸浙。初阮元以造艇銀鉅萬。全付忠毅。曰船乃兵將所寄命。文官不善于工。請公自造之。忠毅曰公不疑我。我當任之。命守備黃飛鵬及族人費銀入閩造艇。至是艇成名曰霆船。最堅壯。加以大礮。兵威大振。夏擊蔡牽于岐頭東霍等洋。擒獲甚夥。七年春獲盜張如茂船于□□□□□于閩東滬。是時水澳等賊。以次殄滅。海盜畏霆船。勢頗戢。八年正月。蔡牽匿定海北。忠毅

以舟師掩至。牽僅以身免。追至閩。糧藥盡。篷索朽。遣其黨千道員慶徠。乞降于總督。總督不虞其詐。招撫之。牽又言果許降。勿令浙兵由上風來逼我。總督調浙兵居下風。牽以其間繕器備物。揚帆去。總督大怒。趣浙兵擊之。已無及矣。十一月。擊牽于三沙。沈其船一。牽北竄。蹙之于溫州南麂。奪其船二。沈其一。焚其一。斬獲無算。是年兼攝定海鎮。凡十閱月。蔡牽畏霆船厚。賂閩商更造船之大于霆者。令商載貨出海。濟牽用。商歸岸偽報被劫。牽得大船。遂能渡橫洋。渡臺灣。九年夏。劫臺灣米數千石。及大橫洋臺灣船。會閩粵間盜朱漬斷糧。牽分米飽之。遂與漬合。八十餘大船。猝入閩海。溫州總兵胡振聲。以二十四船入閩。運船工木。總督遽檄振聲擊之。振聲陷于漬。死之。賊勢甚熾。六月。玉德阮元會奏請忠毅總統閩浙水師。以溫州海壇二鎮爲左右翼。專捕蔡牽。秋。牽漬同入浙。八月。追及之于馬蹟。牽漬結爲一陣。忠毅督兵衝貫其中。盜分東西竄。逐至盡山。沈其二船。斃牽船盜數十人。俘餘船五十餘人。終以牽船高未獲。遁去。牽責漬不用命。漬怒先返。自是牽漬始分。牽亦少衰。忠毅建議禁商造大船。無爲盜資。十二月。漬結粵盜伺金廈。忠毅擊走之。奪其船二於甲子洋。牽擾臺灣。奉旨調福建水師提督。責捕牽。十年夏。牽由臺入浙。忠毅擊之於青龍港。阮元奏浙江提督孫廷璽不諳水師。奉旨復調忠毅爲浙江提督。九月。被風于盡山。所部船多損。冬。牽聚船百餘。復擾臺灣。結陸路無賴萬餘人。屯洲仔尾。沈舟塞鹿耳門。阻官兵。十二月。忠毅至臺。不得入。然分力回拒忠毅。以故臺灣府城得不破。時南北汕安平大港門三處。尙通小船。忠毅掘之。別

以小澎船五十令金門總兵許松年。澎湖副將王得祿。進攻之。焚獲三十餘船。盜千餘人。十一年正月。忠毅令許松年進柴頭港。自領兵截港外。松年得祿水陸夾擊之。焚獲甚夥。二月朔。令松年夜入洲仔尾。登山焚其寮大船。盜至鹿耳門者掩至。忠毅別遣將以火攻船。從南汕出其後燒之。松年進壘之。焚斬無算。二日復登岸擊陸賊。以火焚其小船。尸橫七八里。賊大敗。棄洲仔尾。困守北汕內。僅餘五六十船。七日東風大。潮驟漲。鹿耳門所沈舟漂去。賊奪門出。忠毅追擊之。奪其船十餘。而牽竟遁去。詔奪公翎頂。立功自贖。四月。牽濟在福寧。追擊之。牽入浙。又擊之于台州。八月。擊之于定海漁山。忠毅專擊牽舟。牽瓦石火器雨下。公額身皆受傷。牽復遁去。詔賜還頂戴。果擒渠。許錫世職。九月。擊牽於閩之竿塘。獲牽姪蔡添來。十二月。擊牽于溫之三盤。多所斬獲。初。忠毅與阮元同志氣。十年。元欲造更大于靈船之大船。寓書忠毅。旋以父喪去官。忠毅言于總督。請造之。總督阻之。牽自鹿耳門遁入內海。甚狼狽。篷柁皆毀。四月。至福寧。得岸奸接濟。易新篷。勢復張。忠毅皆列狀奏聞。上切責閩文武官。逮總督。以阿林保爲總督。阿林保初至閩。閩官交譖公。阿林保密劾公。因循逗遛。捏報斬獲。奏五上。上以問浙江巡撫清安泰。清安泰辨之。九月。奉上諭云。本日清安泰奏到。查明李長庚在洋捕盜。並無因循懈怠一摺。所奏甚屬公正。阿林保前此密參李長庚。因循怠玩。種種貽誤。請將伊革職治罪。朕覽該督所奏。卽覺不愜。阿林保身任總督。原不能無參劾之舉。但伊到任不過旬月。地方公事。一切未辦。海洋情形。素未熟悉。而于李長庚更從未謀面。輒行連

次參奏專以去李長庚爲事。殊屬冒昧。是以降旨令清安泰秉公詳查。俟奏到時再行核辦。而本日據清安泰覆奏。則稱李長庚帶領兵船經過海口。並未回署。清安泰曾于致阿林保信中。將其兩年在外公爾忘私之處敘及。特阿林保尚未接到耳。又據稱海船若不勤加燂洗。則船底苔草螻蟲粘結。輒駕駛不靈。故隔越兩三旬。卽須傍岸燂洗。李長庚收船進港。委非無故逗遛。而李長庚所獲李按實係蔡牽夥黨。俱經審明確鑿。並無捏報斬獲情弊。並據另片奏稱八月十六日。李長庚帶兵圍攻蔡逆坐船一事。將盜船燒沈二隻。斃賊無算。生擒七名。不但李長庚身受多傷。卽黃飛鵬亦被砲彈擲傷腰腿。又官兵受傷者一百四十餘人。清安泰又轉詢黃飛鵬何定江二人。亦均稱李長庚實在奮勇。並無怠玩等語。是阿林保前此參奏李長庚之處。均係捕風捉影。全屬子虛。設朕誤信其言。不加詳察。卽照阿林保所奏辦理。則李長庚正當奮不顧身爲國殄賊之際。忽將伊革職鞫問。成何事體。豈不令水師將弁寒心。試問水師中有過於李長庚者乎。阿林保未見確實。任意糾彈。殊屬冒昧。朕又不昏愎糊塗。豈受汝蠱惑。自失良將耶。李長庚平日既無逗遛怯情事。此次在長途洋面痛剿蔡逆。身先士卒。躬受多傷。實爲認真出力。朕已特降恩旨。先行賞還頂戴。以示獎勵。并將勦辦蔡逆一事責成該提督勉以成功。李長庚感激朕恩。既知責無旁貸。自必倍加奮勉。兵船在洋捕盜。全在地方官協力幫助。文武和衷。方克有濟。從前玉德在閩浙總督任多年。于李長庚兵船勦賊之時。事事掣肘。如所需火藥砲位船隻兵米等事。不能應手。而于盜船接濟。

之路又不爲之嚴行杜絕以致兵船日形匱乏盜船駛竄自如追捕不能得力此等實在情形朕皆洞悉是以將玉德革職逮問今兵船正當勦捕喫緊之際若阿林保尙不知以公事爲重屏除私見猶復輕聽人言罔恤公論甚至因此次參奏李長庚不能遂意因而挾私逞忿心存嫉忌遇事掣肘使其不能成功以致蔡逆通誅海疆貽誤則阿林保之罪甚大玉德卽伊前車之鑒朕惟執法懲辦是此時李長庚不至革職治罪而阿林保不知改悔轉恐不免矣阿林保著傳旨嚴行申飭並諭溫承惠清安泰知之十二年春忠毅追牽入粵擊之于大星嶼四月擊粵盜鄭一于佛堂洋獲其二艇七月請回寧波辦軍政詔飭之八月卽出海十一月擊牽于閩之浮鷹十二月率福建水師提督張見陞等追牽入粵海廿五日質明至黑水外洋牽僅存三舟忠毅以浙江親軍專擊牽一舟斃賊甚夥又自以火攻船挂牽船將成擒忽賊發一小礮適中忠毅喉忠毅遽殞閩帥張見陞本庸懦又窺總督意頗不受提挈及是遠見總帥船亂遽率舟師退牽乃遁入安南夷海中阿林保以其事聞上震悼哭之廷臣亦哭詔曰浙江提督李長庚宣力海洋忠勤勇幹不辭勞悴懋著威聲數年以來因閩浙一帶洋盜滋事經朕特命爲總統大員督率各鎮舟師在洋剿捕李長庚身先士卒銳意擒渠統兵在閩浙臺灣及粵省洋面往來跟剿艱苦備嘗破浪沖風實已數歷寒暑每次趕上賊船無不痛加剿殺前後殲斃無數擒獲盜船多隻蔡牽亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保等奏到李長庚于上年十二月二十

四日由南澳洋面駛入粵洋追捕蔡牽。望見賊船祇剩三隻。窮蹙已甚。官兵專注蔡逆。窮其所向。追至黑水洋面。已將蔡逆本船擊壞。李長庚又用火攻船一隻。乘風駛近。維住賊船後艙。正可上前擒獲。忽暴風陡作。兵船上下顛播。李長庚奮勇攻捕。被賊船礮子中傷咽喉額角。竟于二十五日未時身故。覽奏爲之心搖手戰。震悼之至。朕于李長庚素未識面。因其在洋出力。疊經降旨褒嘉。並許以奏報擒獲巨魁之時。優予世職。李長庚感激朕恩。倍矢忠藎。不意其功屆垂成之際。臨陣捐軀。朕披閱奏章。不禁爲之墮淚。李長庚辦賊有年。所向克捷。必能擒獲巨魁。朕原欲俟捷音奏到時。將伊封授伯爵。此時李長庚雖已身故。而賊匪經伊連年痛剿之後。殘敗已極。勢不能再延殘喘。指日舟師緊捕。自當縛致巨魁。況李長庚以提督大員。總統各路舟師。今歿于王事。必當優加懋賞。用示酬庸。李長庚著加恩追封伯爵。賞銀一千兩。經理喪事。並著于伊原籍同安縣地方。官爲建立祠宇。春秋祭祀。其靈柩護送到日。著派巡撫張師誠親往同安代朕賜奠。并查明伊子現有幾人。其應襲封爵候伊子服闋之日。交該督撫照例送部引見承襲。其李長庚任內各處分著悉予開復。所有應得卹典。仍著該部察例具奏。以示朕篤念勞臣恩施無已至意。部臣以伯爵請得旨。李長庚著封三等壯烈伯。承襲十六次。襲次完時。給予恩騎尉罔替。其卹賞銀著再給四百兩。全祭葬。賜諡忠毅。忠毅無子。以族子廷鈺爲後襲爵。忠毅治兵有紀律。恩威兼施。諸盜皆畏之。爲之語曰。不怕千萬兵。但怕李長庚。海盜沈振元自言爲盜時泊浙海。夜夢公至。一夜數驚。遂革心投賊。

爲水師健弁。公家故豐。悉毀于兵事。好讀書。究弢略。爲詩古文。修寧波學官。置義塚。爲粥食餓民。士民皆感之。忠毅舉武科會試。卽航海入天津。識海中形勢。及在水師。識風雲沙線。自持柁。老于操舟者不及之。在兵船。緘所落齒。寄其妻吳。蓋以身許國。慮無歸櫬也。閩健將許松年。王得祿等。皆公所薦拔者。朱潰後。爲許松年。破所斃。其弟渥。率衆降于閩。十四年。阮元復任浙撫。八月十八日。福建提督王得祿。浙江提督邱良功。始共殲蔡牽于溫州黑水洋。

朱勇烈公傳

公姓朱。諱射斗。字文光。先世居山西洪洞。曾祖鴻應。徙貴州貴筑。家焉。祖繼昌。諸生。父成林。貴州荔波營把總。皆以公貴。贈武顯將軍。荔波歿。兄弟三人。奉母歸貴筑。公就傳讀書。復棄學入營伍。以孝養。且自樵采。以佐甘旨。乾隆三十二年。以安順府提標後營從征緬甸。功拔外委。從征小金川。大金川。古曠。密拉。噶等處。屢立戰功。歷官川北平遠協把總。貴州新添營千總。賞戴藍翎。荔波營守備。湖北施南協都司。襄陽鎮右營遊擊。廣西賓州營參將。貴州平遠協副將。賞戴花翎。公沈毅果決。臨敵敢戰。自初隨征。卽爲阿文成公所識拔。計金川平。經大小一百八十八戰。身帶九傷。殺賊無算。敗礮樓十二所。器械無算。領積功劄十三次。傷賞銀百六十兩。五十年。簡授湖南鎮寧鎮總兵。調雲南普洱鎮。爲極邊要隘。民苗雜處。私販偷越。最爲邊害。公按時巡察。撫綏得宜。民無越畔。五十七年。從征廓爾喀。冬。奉旨補授福建福寧鎮總兵。明

年調四川川北鎮。六十年，征苗攻黨槽三家廟，多斬獲，克龍角、硯北面山梁。嘉慶元年，克火藤營、大山、克黃土坡，賞蟒袍一襲，又克平隴，破貴魚坡，斷首逆巢穴，石隆寨要路，梟首逆石柳鄧，賞幹勇巴圖魯名號。明年苗疆平，撤師回川北，達州邪匪王三槐滋事，冉文儔、羅其清、蕭占國、張長庚、包正洪、卜三聘、張添倫、辛聰、張世隴等先後應之。川東擾亂，官兵四擊，賊衆分竄。自達州巴州儀隴大竹鄰水開萬通江南江諸縣，大爲賊窟。公既回川北，先破王三槐于金義寺，得旨議敘。既焚金義賊巢，進克茨菇梁商成寨，殲賊盈萬，轉戰至黃家山。山後三槐中鎗逆，破重石香鑪坪，迎擊秋波梁竄匪，擊退巴州賊屯，領兵守保寧。先是圍剿方山坪，首逆冉文儔羅其清未獲，而方山坪卽保寧所轄也。奉嚴旨責以奮勉立功。三槐竄望溪，邀擊之。擒苟文宰等三十七名，復馳擊三槐徐添德風門鋪角山茶店，殺賊四百餘人，得旨褒獎。明年偕副將穆克登布擊羅其清于儀隴雙路場，追擊之四十餘里，殺賊千餘人，復擊退濟川橋賊，擒張碎膝等九人，斬首五百餘級。賊聞儀隴馳應之，賊潰，進攻其清大鵬寨，擒楊正富等三百餘人。明年破冉文儔麻壩寨，鎗殺之。蕭占國、張長庚亦俱殄，得旨議敘。包正洪踞鄰水，公督兵自萬縣馳赴賊屯，戰康家坪趙家場，擒李有隴孫成，追逐之至開縣九龍山，擒馬官成，至厚葉溝擒莫以才，復及之小毛坪。賊踞山，公鼓兵直上，正洪被鎗死，賊大潰，得旨褒獎，賜騎都尉世職。卜三聘踞八石坪，破之。張添倫、辛聰竄湖北巴東，已復宜房縣，遇竄匪高二馬五，公率兵迎擊，斃百餘人。高二馬五潛襲我營，擊却之。擒潘受榮等，時公感冒風

塞病幾危。以兵授提督。七十五就醫夔州。甫浹旬。陝西竄回各賊。滋擾通江南江。經略額公檄公剿捕。公力疾馳往。大破之。通江追擊至竹峪關。復破之。德漢城追擊至朱家壩。賊望風遁。由是經略奏公分剿通南。明年張世隴屯聚草廟。公領衆截殺。多所斬獲。而經略將赴陝西。復調公至達州。與總督魁倫會剿。公從南江雷音鋪至達州。賊乘隙自定遠潛渡嘉陵江。官兵自順慶渡河迎截。賊走西充文井場。比追及。賊已夜遁。公急馳十餘里。及賊後隊。追戰越三十餘里。殺賊四五百人。生擒百餘人。乘勝追至蓬溪高院場。賊分奔上山。公督兵直上。突有賊七八千人來拒。衆寡不敵。公猶手刃十餘人。遇坎墜馬。歿于險。事聞。照提督例議卹。賜二等輕車都尉世職。子樹承襲。蔭戶部主事。予祭葬。七年陝西獲戕公者。賊目李目剛。上命磔之。設公靈致祭。復傳首祭于公墓。八年入祀昭忠祠。賜諡勇烈。公自乾隆三十二年隨征。至授命之日。凡三十四年。初受高宗純皇帝恩遇。由行伍拔擢至副將。又專闢五省。每入覲。以老臣目之。于請賀萬壽聖節。奉有汝舊人也不必來之諭。皇上御極。復蒙異數。錫賚便蕃。凡有微功。必邀甄錄。公感兩朝知遇。臨敵奮勇。賊畏之。有朱虎之號。雖被創嬰疾。一聞賊。卽抽戈而起。管慨然曰。某受恩深重。卽效命疆場。尚不足以仰報萬一。其感奮如此。其在軍。恩威兼濟。軍容整飭。訓練有方。民不騷擾。士皆用命。尤軫卹難民。拯濟者不下萬人。公死。兵民皆流涕。賊旣退。營卒倉卒收公骸歸葬。遺其左足。明日川民于戰處得之。別葬于潼川府鳳皇山仙人掌。子樹欲奉足歸葬。川民哀留之。遂別爲墓建祠。思祀之。弗能歸也。

大竹縣知縣死事張君傳

張君位中，字立人，江蘇上海縣人。乾隆五十四年進士，改知縣。歷署四川射洪、遂寧、中江。所至與民敦禮義，重廉恥。民以此樂之。嘉慶二年，調署大竹。是時白蓮教擾川北，山營山竄，渠縣與大竹近。君訓練鄉勇爲堵截計。十月，遇於礮洞門，殺賊三，生擒三，割首級三十一。月，賊犯石埡口，殺賊八，賊趨柑子鋪。率官弁禦之，殺賊一。再遇河灘，殺賊二十三，賊窺觀音橋。鄉勇夾擊，斃賊甚衆，薄暮雨甚，乃逸。旣而賊犯天華山，君會官兵擊之，殺二百餘，生擒三，首級二十六。賊竄鄰水，君分路截之，殺賊八十。騎賊一，賊勢衆，君堅立木寨，設滾木檣石以禦。十二月，賊由吳仁王豕二場竄入境，君禦之，殺賊三百。賊分在鄰水者萬餘，至鄉勇不能禦，退保周家場。賊焚大安壩，君馳禦之，殺二十餘，生擒賊易文祥。次日，遇七碑石及大安壩，斃賊五十餘。賊屯周家場，縱火將遁，擊之，斃二百餘。復分領首繞賊後夾擊，賊潰。由鎖石橋攻各卡，木石擊斃五十餘。乃退。君分率鄉勇追剿，殺賊五，騎賊三。三年正月，賊徐添德擾遠道，與張瓏登合，遂圍城。焚南北西三門。君率縣丞熊泗、教諭馮灼、外委王耀龍，分門奮擊，復縋鄉勇出城，斃賊甚多。騎賊十餘，戴花翎者中鎗落馬，爲賊衆挾去。又傷賊一，皆曰雷元帥也。次日，圍益急，復殺賊百。適副都統至，圍乃解。四月，賊王三槐由達州至墩子河，分兩隊。君鼓鄉勇截殺，越二日，賊又分五隊。君亦分鄉勇爲五，殺賊二十。又獲執大旗賊目，掌號賊目各一。明日復集，斃賊三十餘，生擒三。而鄉勇殲賊於石橋鋪者，亦獲首級十二。五月

賊撲柑子鋪斃百餘。徐添德等乃復由堡子壩趨城。君率鄉勇迎擊。生擒四。再遇踏水橋領首等鎗矛並舉。斃賊百餘。賊潰北遁。七月。賊竄月漢坪。分隊至雙河及楊通廟。而陝賊阮正隆、張漢潮闖入川。與冉文儔合。踞大神山。將渡河。君沿岸堵禦。八月。賊攻義門關。趨李家場。擊卻之。賊越山。鄉勇黃瑄殺騎賊一團。練首周發遠殺賊十餘。獲白旗一。賊乃東南分竄。九月。媽媽場殲賊五十。賊由土地壩向磴門洞縱火。兵勇各路奮擊。殲七十餘。十月。徐添德等偕茅峯壩竄入永興場。鎗斃十餘賊。分隊從波漩河至石橋鋪。復殺二十餘。賊乃由鎖石橋潛至木魚池。遇伏。殺賊三十餘。各團領復斃四十餘。騎賊一。其撲石門口等隘者。乃不能踰。賊趨鄰水。追擊之。殺賊八十一。賊王光祖四出焚掠。去城僅十里。鄉勇并力衝擊。斃五十三。生擒二。君告諭居民。無不奮勉。殺賊二百餘。十二月。賊攻月城寨。斃賊無算。而堡子壩亦殺賊三十二。賊徐添德乃由渠縣趨碁洞門。軍功張偕等殺六十餘。賊欲爲久持計。因縱火焚其巢。殺二百餘。乃退。四年正月。賊繞烏木灘。薄城。君約鄉勇三路進剿。以白布印義勝字。注名姓其上。賊望氣懾。由黃泥扁遁去。追殺二十餘。次日復殺執旗賊一。旗書黃將軍字。又獲賊目文添富林萬氏。磔之。賊越李家壩山。鄉勇出其背。斃二十餘。八日。徐添德從渠縣闖入圍城。三月。賊王登廷挾衆出山。殺賊四。是役也。賊自斃及墜澗死者四十餘。生擒一。拔出男婦三百餘。四月。賊衆由蚊蟲溪渡達河。鄉勇疊之。鎗斃賊四。賊由涼風壩周家場連結。擊卻之。五月。賊包正洪與王光祖合。約萬五千人。往來靡定。六月。竄東嶽廟。去城甚近。官兵殺

騎賊三。七月，賊張子聰包正洪黨復至，擊殺賊九。騎賊二，由鄰水而遁。自是連月堵禦，民力凋瘵。君設賑三月，活九萬餘口。釐定規約一，歸遠方被脅男婦資糧護送一，被脅歸業者補入保甲一，歸業者分別給與籽種一，散給口糧一，責寨長約保一，被圍之戶遺產清查，居民由是帖然。五年正月，賊由墊江擾龍門寨，殺賊四十，賊或聚或散，跡頗詭祕。三月，賊二千窺永興場及山梁寨，直趨東流橋，去城十里，勢益張。十四日，大隊由新寧竄入境，與徐萬富合。君率官兵進禦，十五日旦，君率外委王耀龍至城外東嶽廟，與賊相拒。君鼓衆進戰，殺賊數十，賊衆鄉勇不能支。君馬上發四矢，斃騎賊一，傷賊二，賊冒矢合圍。一賊以矛衝入，君拔腰刀擊之，賊傷衆，賊爭進，君力竭死之。左巨指爲矛所折，身被八創。外委王耀龍及家丁差役皆死。先一日，廟中地忽生一蓮，光采甚耀，人以爲君之祥也。是日，賊屯王家壩，至十九日乃遁。然城所以不破者，君之功也。大吏上其事，奉旨，禦賊陣亡之大竹縣知縣張位中，交部議卹。君當縣多事時，興利除弊，籌畫無遺。勸里甲互團練，諭鄉村修寨，遇警則親督戰，死事者捐俸撫卹。平居勸民息訟耕作，以裕其食。著萬竹居詩一卷，父泰源生員，祖成舉人，曾祖麟，子一，惇誼，襲雲騎尉。論曰：君生沃土，貌清臞，書生也，乃馬上殺賊，衛民存城，得死所，偉矣哉。

福建布政使良吏李君傳

李廣芸，字生甫，江蘇嘉定人。祖芳，父夢璫。乾隆壬戌進士，江西寧都直隸知州。君少從錢辛楣先生學，孝

於繼母。敦品節。礪廉隅。爲時所稱。通六書。蒼雅。三禮。善屬文。以禮經史志爲根柢。在文家別開一徑。嘉許叔重之學。故又字許齋。乾隆庚戌。以二甲進士用知縣。發補浙江孝豐縣。五十九年。調德清縣。嘉慶元年。調平湖縣。二年。卓異。候陞。三年冬。九卿中有密薦君者。特旨問巡撫阮元。元以廣芸爲浙省第一賢員。守潔才優。覆奏。奉旨送部引見。以同知用。尋陞處州府同知。調嘉興府海防同知。八年三月。奏委署台州府知府。奉硃批。此人可用。閏六月。陞授嘉興府知府。十四年。丁繼母憂歸。十六年。服闋。補福建汀州府知府。十九年。調漳州府知府。秋。擢汀漳龍道。二十年秋。擢福建按察使。署布政司。十二月。卸事。陞見。回閩。九月。旋擢福建布政使。君性廉正。敝衣疏食。率以爲常。任監司。無異寒儒。自爲縣令至藩臬。所在皆有惠政。得民心。感民以誠。久而益篤。其治平湖也。承前令廢弛之後。盡心撫字。訓士除姦。邑中稱神明。下車之日。以陸清獻曾官嘉定。而已以嘉定人官平湖。首謁其祠。爲治勉法清獻。其守嘉興也。正己率屬。莫敢以苞苴進者。生辰令節。閉戶卻掃。元理浙漕。持官民軍三者之平。多用君之言。至今沿其法。五年。金華處州水災。元已馳奏恩賑矣。金華民苦無錢。錢價大貴。處州苦無米。米亦貴。元加銀二萬兩付君曰。惟惠于民。任便宜爲之。君以銀之半易錢。載至金華。加賑。民百錢。民益安。而錢價頓平。又以銀之半買米於溫州。運處州。減價糴之。復以糴錢轉輸運米。而米亦賤。十年。嘉興水災。君奉檄減糴。實惠及民。復分廠賑民以粥。食數十萬人。粥厚而吏不侵。全活者衆。及蒞閩。亦多惠政。任漳州時。漳俗獷悍。睚眦小怨。兩族聚衆持兵械相

攻擾甚則施鎗礮殺傷人名曰械鬪其負者輒告諸官官拘犯則又匿而抗故縣令必會營兵以往糗糧之費獨責之縣以故縣皆困君初至有歸德堡某姓械鬪龍溪令黃懋修束手無所施君亦未有策朱履中者內狡肆而外樸誠攝平和縣事受代來謁君詢曰平和亦械鬪乎曰有之擒渠必以兵乎對曰爲民上者平日不以徭訟擾民遇有應捕主名飭里長縛以獻無不如指兵則多費矣安可用乎君諦之惡人也視爲真能感民者乃請於督撫以朱代黃逾月不辦督之朱曰莅事新民未孚也又久之知其終不辦也親率兵往治無所得乃費帑七百兩旣訖事與朱分任之數月遷汀漳龍道未幾又遷按察使署布政使會甄別朱爲教職朱虧鹽課五千餘兩抵以他款數相當代者張均不聽抵漳守畢所謫昔納朱賄而今苛督之朱窮且憤具揭督撫謂虧帑由道府婪索督撫合詞密奏君遷布政使甫二旬而解任矣君之在漳也有監造戰船不如式被駁重修君已去任家人稱貸於朱以竣事而君不知也質訊時朱撫前二事指爲贓私家人自承稱貸事實有之而君惶不知總督桐城汪志伊益疑之飭兩司及福州府必欲窮其獄歲除至漏盡乃罷正月四日復促君對簿君終不肯誣服十八日總督謂獄不成將并罪案事者福州知府索詞急聲色益厲君恐爲獄吏所挫辱夜縊於牀以歿寮屬相與泣士民數千人走數百里號哭於門累月不絕事聞上使吏部侍郎熙昌副都御史王引之理其獄乃抵朱履中等罪督撫皆罷斥閩士林林天等公呈於使者云故藩李公學殫經術才裕藩宣簡在天心惠孚民望歷官卅載居閩五年先

綰郡符。涖躋方伯。持躬謹飭。蒞事精勤。抱慙依忠。安良戢暴。其平反疑獄。囹圄無冤。禮士愛民。窮黎存活。蒞漳時。首械書役。蠹風斂迹。閤郡稱神。其止息鬭爭。則如龍溪縣屬之歸德堡。鄒蘇滿巨族。仇殺多年。公察知緣爭。佔祠墓起衅。親詣秉公勘斷。兩造冰釋。相安無事。其禁戢佳符。則如漳屬九龍嶺扼要處。所設立堆房。兵役防守。商旅坦行。士盜蔡可黃鐘。在海伺劫。勢漸鴟張。公移行沿海廳縣嚴查口岸。匪船逃竄。隨後督飭漳浦詔安等縣。拏獲盜首。所有議鼓。仍歸各屬。不自居功。此仁教最鉅。傳頌至今。其他善績。不能殫述。詎意本年正月卸事身故。部民同聲嗟悼。雖荒村僻里。婦人童子。亦知歎惜。公館臨終。景况淒涼。不可言狀。質衣買棺。殮具儉陋。零丁孤寡。幾至停炊。行道聞之。莫不感泣。省會士庶。拈香拜靈者。風馳雲集。汀漳憲轄人民。咸爲設位弔祭。誦經禮懺。共抒哀思。猶恨無以爲報。伏念生而澤被閭閻。歿而貧逾草布。義有必勸。德無不酬。林光天等泣號昊天。若半途而失父母。尸祝飲食。宜百世以祀春秋。在朝廷議禮秩宗。且俟馨香於名宦。在草野報恩身後。非同違禁之生祠。現今閤省士民。捐貲建李公遺愛專祠。以慰輿情。而存公義。得旨允行之。且諭曰。斯民直道之公也。祠今建於懷德坊。鹽法道孫爾準。素與李君善。經紀其喪。君歿後。家無以爲炊。柩之歸也。士居僚友。頗多賻贈。君之子尙幼。幸以餬餽粥。居於嘉興。評曰。元在史館。欲纂儒林文苑循吏三傳。儒林甫脫稿。俄奉使出都。文苑循吏。未之纂也。李君之事。既論定。上硃書使者奏中曰。良吏洵榮褒也。元故以良吏名。此傳以貽史館之纂循吏者。

次仲凌君傳

凌君諱廷堪。字次仲。安徽歙縣人。遠祖安唐。顯慶中任歙州州判。遂家于歙。父文煊。業賈于海州。君生海州。六歲而孤。困苦窮巷中。母王氏。鬻簪珥就塾師。麤記姓名而已。去學賈不成。年二十餘。始復讀書嚮學。能屬文。懼時過難成也。著辨志賦以見志。乾隆四十六年。遊揚州。慕其鄉江慎修。戴東原兩先生之學。四十八年至京師。始多交游。大興翁覃溪先生。見君所撰述。大嗟異。始導之爲四書文。應順天鄉試。不中。明年復遊揚州。見元以學問相益。君乃擬李白大鵬見希有鳥賦以見意。五十一年。復入都。應試。不中。明年從翁先生于江西。又明年客河南。秋三應順天鄉試。始中副榜。南歸。五十四年。應江南鄉試。中式。明年成進士。出朱文正王文端二公之門。蓋與洪君亮吉等皆以宏博見拔者也。殿試三甲。例授知縣。君投牒吏部。自改教授。曰。必如此。吾乃可養母治經。文端曰。吾不強子改冷官。子願之甚善。文正題其授禮部。曰。君才富江戴。又曰。遠利就冷官。蓋甚重之。既選寧國府學教授。乃奉母暨兄嫂之官。孝弟安貧。謹身節用。畢力著述。君之學。博覽強記。識力精卓。貫通羣經。而尤深于禮經。著禮經釋例十三卷。君謂禮儀委曲繁重。不得其經緯塗徑。雖上哲亦苦其難。苟得之。中材可勉赴焉。經緯塗徑之謂何。例而已矣。如鄉飲酒。此飲食之禮也。而有司徹祭畢飲酒。其例亦與之同。尸。卽鄉飲酒之賓也。侑。卽鄉飲酒之介也。主人獻尸。主人獻侑。主人受尸酢。卽鄉飲酒之主人獻賓。主人獻介賓酢主人也。主人酬尸奠而不舉。卽鄉飲酒之主人

酬賓奠而不舉也。旅酬無算爵。卽鄉飲酒之旅酬無算爵也。此異中之同也。有司徹獻尸獻侑及受尸酢。有豆籩牢俎七滑肉滑燔從諸節。鄉飲酒獻賓獻介及酢主人。但薦與俎而已。有司徹獻尸獻侑之禮。主人主婦上賓凡三獻。鄉飲酒但主人一獻而已。有司徹獻尸侑畢。復有獻長賓。主人自酢。及酬賓之儀。鄉飲酒但獻衆賓而已。有司徹旅酬使二人舉觶于尸侑以發端。鄉飲酒但使一人舉觶于賓而已。有司徹無算爵。賓黨則用主酬賓之觶。主人黨則用兄弟後生所舉之觶以發端。鄉飲酒則但使二人舉觶于賓與介而已。此同中之異也。推之于士冠禮冠畢醴賓以一獻之禮。鄉飲酒鄉射明日息司正。特牲饋食禮祭畢獻賓。其例皆大約相同。而鄉射之同于鄉飲酒者。更無論也。又如聘禮之聘享觀此賓客之禮也。而聘畢問卿面卿及士昏禮納采納徵之屬。其例亦與之同。問卿授束帛。昏禮授雁。卽享禮之授璧也。問卿及昏禮納徵庭實用皮。卽享禮之庭實用皮也。昏禮使者禮畢主人禮賓。卽聘禮之聘賓禮畢主國之君禮賓也。面卿幣用束錦庭實用馬。卽私覲之幣用束錦庭實用馬也。聘賓面卿畢介面衆介面。卽聘賓之私覲畢介覲衆介覲也。此異中之同也。聘用圭享用璧面卿及昏禮無授玉之事。但用束帛及雁。如享禮而已。聘禮聘賓至。昏禮使者至。皆設几筵。問卿賓及廟門不几筵。但賓者請命而已。聘禮既享未覲之際。則禮賓問卿畢不儼。但行面卿之禮而已。聘禮禮賓侑醴以幣。昏禮禮賓但酌醴禮之而已。聘享聘賓主國之君皆皮弁服有褻楊之殊。問卿聘賓主人但朝服。昏禮使者主人但元端而已。聘禮受玉于中堂與

東楹之間。問卿則受幣于堂中西。昏禮則受雁于楹間而已。此同中之異也。推之于士相見禮及聘禮郊勞致館歸饗餼其例皆大約相同。而聘禮之同于覲禮者更無論也。是故鄉飲酒鄉射燕禮大射不同也。而其爲獻酢酬旅酬無算爵之例則同也。聘禮覲禮不同也。而其爲郊勞執玉行享庭實之例則同也。特牲饋食少牢饋食不同也。而其爲尸飯主人初獻主婦亞獻賓長三獻祭畢飲酒之例則同也。鄉射大射不同也。而其爲司射誘射初射不釋獲再射釋獲飲不勝者三射以樂節射飲不勝者之例則同也。不會通其例一以貫之祇厭其膠葛重複而已耳。烏覲所謂經緯塗徑者哉。於是區爲八類曰通例上下二卷曰飲食之例上中下三卷曰賓客之例一卷曰射例一卷曰變例一卷曰祭例上下二卷曰器服之例上下二卷曰雜例一卷共爲卷十三。至于第十一篇自漢以來說者雖多由不明尊尊之旨故罕得經意。乃爲封建尊尊服制考一篇附於變例之後不別立宮室之例者宋李氏如圭等已詳故也。君又著燕樂考源元遣山年譜按禮堂集又著魏書音義未成君雄于文九慰七戒兩晉辨亡論十六國名臣序贊諸篇上擬騷選鄉射五物考九拜解九祭解釋性詩楚茨考旅酬下爲上解諸篇皆說經之文發古人所未發其尤卓然可傳者則有復禮三篇唐宋以來儒者所未有也。復禮上曰夫人之所受於天者性也性之所固有者善也所以復其善者學也所以貫其學者禮也是故聖人之道一禮而已矣。孟子曰契爲司徒教以人倫父子有親君臣有義夫婦有別長幼有序朋友有信此五者皆吾性之所固有者也。聖人知其然

也。因父子之道而制爲士冠之禮。因君臣之道而制爲聘覲之禮。因夫婦之道而制爲士昏之禮。因長幼之道而制爲鄉飲酒之禮。因朋友之道而制爲士相見之禮。自元子以至於庶人少而習焉長而安焉禮之外別無所謂學也。夫性具於生初而情則緣性而有者也。性本至中而情則不能無過不及之偏。非禮以節之則何以復其性焉。父子當親也。君臣當義也。夫婦當別也。長幼當序也。朋友當信也。五者根於性者也。所謂人倫也。而其所以親之義之別之序之信之則必由乎情以達焉者也。非禮以節之則過者或溢於情而不及者則漠焉遇之。故曰喜怒哀樂之未發謂之中。發而皆中節謂之和。其中節也非自能中節也。必有禮以節之。故曰非禮何以復其性焉。是故知父子之當親也則爲醴醢祝字之文以達焉。其禮非士冠可賅也。而於士冠焉始之。知君臣之當義也則爲堂廉拜稽之文以達焉。其禮非聘覲可賅也。而於聘覲焉始之。知夫婦之當別也則爲笄次悅顰之文以達焉。其禮非士昏可賅也。而於士昏焉始之。知長幼之當序也則爲盥洗酬酢之文以達焉。其禮非鄉飲酒可賅也。而於鄉飲酒焉始之。知朋友之當信也則爲雉膺奠授之文以達焉。其禮非士相見可賅也。而於士相見焉始之。記曰禮儀三百威儀三千其事蓋不僅父子君臣夫婦長幼朋友也。即其大者而推之而百行舉不外乎是矣。其篇亦不僅士冠聘覲士昏鄉飲酒士相見也。即其存者而推之而五禮舉不外乎是矣。良金之在升也非杲氏之模範不能爲量焉。良材之在山也非輪人之規矩不能爲車焉。禮之於性也亦猶是而已矣。如曰舍禮而可以復性也。

是金之爲量。不必待模範也。材之爲車。不必待規矩也。如曰舍禮而可以復性也。必如釋氏之幽深微渺。而後可。若猶是聖人之道也。則舍禮奚由哉。蓋性至隱也。而禮則見焉者也。性至微也。而禮則顯焉者也。故曰莫見乎隱。莫顯乎微。故君子慎其獨也。三代盛王之時。上以禮爲教也。下以禮爲學也。君子學士冠之禮。自三加以至於受醴。而父子之親油然而矣。學聘親之禮。自受玉以至於親勞。而君臣之義秩然矣。學士昏之禮。自親迎以至於徹饌成禮。而夫婦之別判然矣。學鄉飲酒之禮。自始獻以至於無算爵。而長幼之序井然矣。學士相見之禮。自初見執贄以至於既見還贄。而朋友之信昭然矣。蓋至天下無一人不囿於禮。無一事不依於禮。循循焉日以復其性於禮而不自知也。劉康公曰。民受天地之中以生。所謂命也。是以有動作禮義威儀之則。以定命也。故曰天命之謂性。率性之謂道。修道之謂教。夫其所謂教者。禮也。卽父子有親。君臣有義。夫婦有別。長幼有序。朋友有信。是也。故曰學則三代共之。皆所以明人倫也。復禮中曰。記曰。仁者人也。親親爲大。善者宜也。尊賢爲大。親親之殺。尊賢之等。禮所生也。此仁與義不易之解也。又曰。君臣也。父子也。夫婦也。昆弟也。朋友之交也。五者。天下之達道也。知仁勇三者。天下之達德也。此道與德不易之解也。不必舍此而別求新說也。夫人之所以爲人者。仁而已矣。凡天屬之親。則親之。從其本也。故曰。仁者人也。親親爲大。亦有非天屬之親。而其人爲賢者。則尊之。從其宜也。故曰。義者宜也。尊賢爲大。以喪服之制論之。昆弟親也。從父昆弟則次之。從祖昆弟又次之。故昆弟之服。則疏衰裳齊期。從父

昆弟之服。則大功布衰裳九月。從祖昆弟之服。則小功布衰裳五月。所謂親親之殺也。以鄉飲酒之制論之。其賓賢也。其介則次之。其衆賓又次之。故獻賓。則分階其俎用肩。獻介。則共階其俎用肫脰。獻衆賓。則其長升受有薦而無俎。所謂尊賢之等也。皆聖人所制之禮也。故曰親親之殺。尊賢之等。禮所生也。親親之殺。仁中之義也。尊賢之等。義中之義也。是故義因仁而後生。禮因義而後生。故曰君子義以爲質。禮以行之。孫以出之。信以成之。禮運曰。禮也者。義之實也。協諸義而協。則禮雖先王未之有。可以義起也。郊特牲曰。父子親。然後義生。義生。然後禮作。董子曰。漸民以仁。摩民以義。節民以禮。然則禮也者。所以制仁義之中也。故至親可以拚義。而大義亦可以滅親。後儒不知。往往於仁外求義。復於義外求禮。是不識仁。且不識義矣。烏覩先王制禮之大原哉。是故以昆弟之服。服從父昆弟。從祖昆弟。以獻賓之禮。獻介獻衆賓。則謂之過。以從祖昆弟從父昆弟之服。服昆弟。以獻介獻衆賓之禮。獻賓。則謂之不及。蓋聖人制之而執其中。君子行之而協于中。庶幾無過不及之差焉。夫聖人之制禮也。本於君臣父子夫婦昆弟朋友五者。皆爲斯人所共由。故曰道者所由適於治之路也。天下之達道是也。若舍禮而別求所謂道者。則杳渺而不可憑矣。而君子之行禮也。本之知仁勇三者。皆爲斯人所同得。故曰德者得也。天下之達德是也。若舍禮而別求所謂德者。則虛懸而無所薄矣。蓋道無跡也。必緣禮而著見。而制禮者以之。德無象也。必藉禮爲依歸。而行禮者以之。故曰苟不至德。至道不凝焉。是故禮也者。不獨大經大法。悉本夫天命民彝而出。

之。卽一器數之微。一儀節之細。莫不各有精義。彌綸於其間。所謂物有本末。事有終始。是也。格物者。格此也。禮器一篇。皆格物之學也。若泛指天下之物。有終身不能盡識者矣。蓋必先習其器數儀節。然後知禮之原於性。所謂致知也。知其原於性。然後行之出於誠。所謂誠意也。若舍禮而言誠意。則正心不當在誠意之後矣。記曰。自天子以至於庶人。壹是皆以修身爲本。又曰。非禮不動。所以修身也。又曰。修身以道。修道以仁。卽就仁義而申言之。曰。禮所生也。是道實禮也。然則修身爲本者。禮而已矣。蓋修身爲平天下之本。而禮又爲修身之本也。後儒置子思之言不問。乃別求所謂仁義道德者。於禮則視爲末務。而臨時以一理衡量之。則所言所行。不失其中者鮮矣。曲禮曰。道德仁義。非禮不成。此之謂也。復禮下曰。聖人之道。至平且易也。論語記孔子之言備矣。但恆言禮。未嘗一言及理也。記曰。道之不行也。我知之矣。知者過之。愚者不及也。道之不明也。我知之矣。賢者過之。不肖者不及也。彼釋氏者流。言心言性。極於幽深微眇。適成其爲賢知之過。聖人之道。不如是也。其所以節心者。禮焉爾。不遠尋夫天地之先也。其所以節性者。亦禮焉爾。不侈談夫理氣之辨也。是故冠昏飲射。有事可循也。揖讓升降。有儀可按也。豆籩鼎俎。有物可稽也。使天下之人。少而習焉。長而安焉。其秀者有所憑而入於善。頑者有所檢束而不敢爲惡。上者陶淑而底於成。下者亦漸漬而可以勉而至。聖人之道。所以萬世不易者。此也。聖人之道。所以別於異端者。亦此也。後儒熟聞夫釋氏之言。心言性。極其幽深微眇也。往往怖之。愧聖人之道。以爲弗如。於是竊取其理氣。

之說而小變之。以鑿聖人之遺言。曰吾聖人固已有此幽深微眇之一境也。復從而闢之。曰彼之以心爲性。不如我之以理爲性也。嗚呼。以是爲尊聖人之道。而不知適所以小聖人也。以是爲闢異端。而不知陰入於異端也。誠如是也。吾聖人之於彼教。僅如彼教性相之不同而已矣。烏足大異乎彼教哉。儒釋之互援。實始於此矣。詩曰。鳶飛戾天。魚躍于淵。說者以爲喻惡人遠去。民得其所。卽中庸引而伸之。亦不過謂聖人之德。明著於天地而已。曷嘗有化機也。子在川上曰。逝者如斯夫。不舍晝夜。說者以爲感嘆時往不可復追。卽孟子推而極之。亦不過謂放乎四海。有本者如是而已。曷嘗有悟境也。蓋聖人之言。淺求之。其義顯然。此所以無過不及爲萬世不易之經也。深求之。流入於幽深微眇。則爲賢知之過。以爭勝於異端而已矣。何也。聖人之道。本乎禮而言者也。實有所見也。異端之道。外乎禮而言者也。空無所依也。子所雅言。詩書執禮。顏淵問仁。子曰。克己復禮爲仁。請問其目。曰。非禮勿視。非禮勿聽。非禮勿言。非禮勿動。顏淵曰。夫子循循然。善誘人。博我以文。約我以禮。聖人舍禮。無以爲教也。賢人舍禮。無以爲學也。詩書博文也。執禮約禮也。孔子所雅言者也。仁者行之盛也。孔子所罕言者也。顏淵大賢。其體而徹。其問仁與孔子告之爲仁者。惟禮焉爾。仁不能舍禮。但求諸理也。子貢曰。夫子之文章。可得而聞也。夫子之言性與天道。不可得而聞也。文章。詩書執禮也。性與天道。非不可得而聞。卽具於詩書執禮之中。不能託諸空言也。夫仁根於性。而視聽言動。則生於情者也。聖人不求諸理。而求諸禮。蓋求諸理必至於師心。求諸禮始可以復

性也。顏淵見道之高堅前後幾於杳渺而不可憑。迨至博文約禮然後曰如有所立。卓爾即立於禮之立也。故曰不學禮無以立。又曰不知禮無以立也。其言之明顯如此。後儒不察。乃舍禮而論立。縱極幽深微眇。皆釋氏之學。非聖學也。顏子由學禮而後有所立。於是馴而致之。其心三月不違仁。其所以不違者。復其性也。其所以復性者。復於禮也。故曰一日克己復禮。天下歸仁焉。夫論語聖人之遺書也。說聖人之遺書。必欲舍其所恆言之禮。而事事附會於其所未言之理。是果聖人之意邪。後儒之學。或出釋氏。故謂其言之彌近理。而大亂真。不然。聖學禮也。不云理也。其道正相反。何近而亂真之有哉。燕樂考原。以隋沛公鄭澤五旦七調之說爲燕樂之本。又參以段安節琵琶錄。張叔夏詞原。遼史樂志諸書。考之琴與琵琶之弦音。從遼史四旦。定四均二十八調。四旦者。華言四均。琵琶四弦。故有四均。七弦七調。故有二十八調。燕樂比雅樂高二律。不用黃鍾濁聲。用夾鍾清聲。蔡元定所謂燕樂用夾鍾爲律本也。琵琶之七調。即三弦與笛之七調。是即今之伶工字譜之合四乙上尺工凡六五。亿仗伋仗也。宋燕樂本十五字。今祇用此十三字矣。二十八調之中。今祇用七商。而七角七羽亦不用矣。江君鄭堂謂其由燕樂通古樂。思通鬼神矣。嘉慶十一年。君以母喪去官。兄嫂相繼歿。哀且病。十三年。元復任浙江巡撫。君免喪。來游杭州。出所著各書相示。元命子常生從君學。明年歸歛病卒。年五十有五。

焦君名循字里堂。世居江都北湖黃珏橋。分縣爲甘泉人。曾祖源。江都縣學生。爲周易之學。祖鏡。父愬。皆方正有隱德。傳易學。君生三四歲卽穎異。八歲至公道橋阮氏家。與賓客辨壁上馮夷字。曰此當如楚辭讀皮冰切。不常讀如縫。阮公廣堯大奇之。遂以女字之。年十七。劉文清公取補學生員。年二十補廩膳生。次年丁父及嫡母謝艱。自殮及葬。八閱月。未櫛沐。食臥不離喪次。甚哀毀。弟徵讀書。自教之。興化顧超宗傳其父文子之經學。超宗與君幼同學。君始用力於經。超宗歿。君理其喪。作招亡友賦哭之。歲乙卯。元督學山東。招君往遊。遂自東昌至登州。有山左詩鈔一卷。嘉慶歲丙辰。元督學於浙。復招君遊浙東。有浙江詩鈔一卷。歲庚申。元撫浙。招君復遊浙。辛酉春。歸揚州。秋。應鄉試。中式。舉人入都。謁座師英煦齋先生。先生曰。吾知子之字曰里堂。江南老名士。屈久矣。歲壬戌。復招君遊浙。冬。歸揚州。歲乙丑。有勸君應禮部試。且資之者。君以書辭之曰。生母殷。病雖愈。而神未健。此不北行之苦心。非樂安佚輕仕進也。殷竟以夏病冬卒。君毀如初。克盡其孝。除喪後。小有足疾。遂託疾居黃珏橋村舍。閉戶著書。葺其老屋曰半九書塾。復構一樓曰雕菰樓。有湖光山色之勝。讀書著書恆在樓。足不入城市者十餘年矣。歲庚辰夏。足疾甚。且病瘡。以七月二十七日卒。距生於乾隆癸未二月三日。得年五十有八。妻阮氏。子琥。廩生。孫三。授易授書授詩。君善讀書。博聞強記。識力精卓。於學無所不通。著書數百卷。尤邃於經。於經無所不治。而於周易孟子。專勒成書。君於易本有家學。嘗疑一號咷也。何以旣見於旅。又見於同人。一拯馬壯也。何以旣見於復。又

見於明夷。密雲不雨之象。何以小畜與小過同辭。甲庚三日之占。何以蠱象與巽象相例。丁父憂後。乃徧求說易之書。閱之。撰述成帙。甲子後。復精研舊稿。悟得洞淵九容之術。貫通於易。乃以數之比例。求易之比例。於是擬撰通釋一書。丁卯病危。以易未成爲憾。病瘳。誓於先聖先師。盡屏他務。專治此經。遂成易通釋二十卷。自謂所悟得者。一曰旁通。二曰相錯。三曰時行。旁通者。在本卦初與四易。二與五易。三與上易。本卦無可易。則旁通於他卦。亦初通於四。二通於五。三通於上。先二五後初四三上。爲當位。不俟二五而初四三上先行。爲失道。易之道。惟在變通。二五先行而上下應之。此變通不窮者也。或初四先行三上先行。則上下不能應。然能變而通之。仍大中而上下應。如乾四之坤。而成小畜。復失道矣。變通之小畜。二之豫。五。姤。二之復。五。復。初不能應。姤。初則能應。小畜。四不能應。豫。四則能應。坎。四之離。上成井。豐。失道矣。變通之井。二之噬嗑。五。豐。五之渙。二。豐。上不能應。渙。上則能應。井。三不能應。噬嗑。三則能應。此所謂時行也。比例之義。出於相錯。如睽。二之五。爲无妄。井。二之噬嗑。五。亦爲无妄。故睽之噬膚。卽噬嗑之噬膚。坎。三之離。上成豐。噬嗑。上之三。亦成豐。故豐之日。昃。卽離之日。昃。豐之日。中。卽噬嗑之日。中。漸。上之歸妹。三。歸妹。成大壯。漸。成蹇。蹇。大壯。相錯成需。故歸妹以須之。卽需也。歸妹。四之漸。初。漸。成家人。歸妹。成臨。臨。通遯。相錯爲謙。履。故眇能視。跛能履。臨。二之五。卽履。二之謙。五。之比例也。易通釋既成。復提其要爲圖略八卷。凡圖五篇。原八篇。發明旁通相錯時行之義。論十篇。破舊說之非。復成章句十二卷。總稱雕菰樓易學三書。

共四十卷。君易學既成。數年中有隨筆記錄之書。編次之得二十卷。曰易餘籥錄。凡友朋門弟子所問答及於易者。取入三書外。多有所餘。復錄而存之。得二卷。曰易話。自癸酉立一簿。自稽所業。得三卷。曰注易日記。又有易廣記三卷。君之易學。不拘守漢魏各師法。惟以卦爻經文比例爲主。號咷密雲。蹤跡甚顯。葵樽酒。假借可據。如郭守敬之以實測得天行也。既又著孟子正義三十卷。疏趙岐之注。兼採近儒數十之家說。而多下己意。合孔孟相傳之正指。君又著六經補疏說曰。說漢易者。每屏王弼之說。然弼之解箕子。乃用趙賓說。孔穎達不能申明之。他如讀彭爲旁。借雍爲甕。通孚爲浮。而訓爲務躁。解斯爲斷。而釋爲賤役。蓋以六書通借。解經之法。尙未遠於馬鄭諸儒。惟貌爲高簡。故疏者視爲空論耳。因作周易王氏注補疏二卷。說尙書者。多以孔傳爲僞。然堯典以下至秦誓。其篇固不僞也。卽魏晉人作傳。亦何不可存。因舉其說之善者。如金縢我之不辟。訓辟爲法。居東卽東征。罪人卽管蔡。大誥周公不自稱王。而稱成王之命。皆非馬鄭所能及。作尙書孔氏傳補疏二卷。毛鄭義有異同。然正義往往雜鄭於毛。比毛於鄭。而聲音訓詁。疏略亦多。因撰毛詩鄭氏箋補疏五卷。春秋成而亂臣賊子懼。左氏傳云。稱君。君無道。稱臣。臣之罪。杜預且揚其詞而暢衍之。與孟子之說大悖。預爲司馬懿女嬀。目見成濟之事。將有以爲昭飾。且有以爲懿師飾。卽用以爲己飾。此左氏春秋集解所以作也。萬氏充宗斥左氏之頗。惠氏半農顧氏棟高糾杜氏之失。然未有摘其姦而發其覆者。撰左氏春秋傳杜氏集解補疏五卷。謂禮以時爲大。蔽千萬世制禮之

法而訓詁名物亦所宜究。撰禮記鄭氏注補疏三卷。論語一書。所以發明伏羲文王周公之旨。其文簡奧。惟孟子闡發最詳最豐。論語一書之中。參伍錯綜。引申觸類。其互相發明者。亦與易例同。撰論語何氏集解補疏二卷。合之爲六經補疏二十卷。君游浙。因元考浙江原委。以證禹貢三江。歸揚州。撰禹貢鄭注釋一卷。專明班氏鄭氏之學。君謂王伯厚詩地理考繁雜無所融貫。作毛詩地理釋四卷。君又仿東原戴氏孟子字義疏證。撰論語通釋一卷。凡十二篇。曰聖曰大曰仁曰一貫忠恕曰學曰知曰能曰權曰義曰禮曰仕曰君子小人。君又撰羣經宮室圖二卷。爲圖五十篇。毛詩鳥獸草木蟲魚釋十一卷。陸璣疏考證一卷。君錄當世通儒說尙書者四十一家。書五十七部。仿衛湜禮記之例。以時之先後爲序。得四十卷。曰書義叢鈔。君思深悟銳。尤精於天學算術。謂梅徵君弧三角舉要。環中黍尺撰非一時。繇複無次。戴庶常勾股割圓記。務爲簡奧。變易舊名。撰釋弧三卷。錢辛楣先生稱是書於正弧斜弧次形矢較之用。理無不包。法無不備。君上書於錢辛楣先生。論七政諸輪。辛楣先生復書云。推闡入微。以實測之數。假立法象以求其合。尤爲洞徹根原。君以弧線之生。緣於諸輪。輪徑相交。乃成三角。輪之弗明。法無從附也。撰釋輪二卷。君又謂康熙甲子律書。用諸輪法。雍正癸卯律書。用橢圓法。實測隨時而差。則立法亦隨時而改。撰釋橢一卷。君又謂劉徽之注九章算術。猶許氏慎之撰說文解字。講六書者。不能舍許氏之書。講九章者。亦不能舍劉氏之書。九章不能盡加減乘除之用。而加減乘除。可以通九章之窮。作加減乘除釋八卷。君與吳

縣李君尙之、歛汪君孝嬰、商論算學。是時李仁卿秦道古之書。兩君未之見也。乙卯君在元署中。得益古演段測圓海鏡二書。急寄尙之。尙之爲之疏通證明。君又得秦氏所爲數學大略。因撰天元一釋二卷。開方通釋一卷。以述兩家之學。尙之敍云。此書於帶分寄母同數相消之故。條分縷析。發揮無餘蘊。自李樂城郭邢臺之後。爲此學者。未如此妙也。又教子琥曰。李樂城之學。余旣撰天元一釋以闡明之。而測圓海鏡益古演段兩書。不詳開方之法。以常法推之。不合。讀者依然溟津黯黯。余得秦道古數學九章。有正負開方法。因作開方通釋。詳述其義。汝可列益古演段六十四問。用正負開方法推算之。因以同名相加異名相消。用超用變之法。詳示琥。琥乃知以秦氏之法。讀李氏之書。布策推算。一一符合。六十四問。每問皆詳畫其式。君喜曰。得此而演段可以讀矣。卽命名曰。益古演段開方補。且曰。可附里堂學算記之末。君又善屬文。最愛柳柳州文。習之不倦。謂唐宋以來。一人而已。後人多斥柳州爲王叔文黨。君爲雪之。且曰。田山蘊古歡集。馮山公王西莊兩先生。於叔文事皆立論平允。足洗不讀書者隨聲附和之陋習。君於治經之外。如詩詞醫學形家九流之書。無不通貫。又力彰家鄉先哲。勤求故友遺書。孜孜不倦。黃珏橋有老屋一區。爲前明忠臣梁公于涖之故宅。君買修之。扁曰北湖耆舊祠。設木主三十位。祀嘗居北湖忠孝行誼載于史志。足爲鄉人表率者。復揭三十人事實于壁。里人頗觀感焉。復理探舊聞。搜訪遺籍。成北湖小志六卷。又因分撰揚州府志。收拾雜文舊事。次第爲目錄一卷。名曰揚州足徵錄。又以隨筆考錄揚揚事者。成

邗記六卷。君每得一書。必識其顛末。或朋友之書。無慮經史子集。卽小說詞曲。亦必讀之。至再。心有所契。則手錄之。如是者三十年。命子琥編寫成里堂道聽錄五十卷。又舉國朝人著述三十二家。作讀書三十贊。又著貞女論二篇。愚孝論一篇。皆有補于世教。君之文集。手自訂者。曰雕菰集二十四卷。詞三卷。詩話一卷。種痘醫說等書。不具錄。君性誠篤直樸。孝友最著。恬淡寡欲。不干仕祿。居恆布衣蔬食。不入城市。惟以著書爲事。湖山爲娛。壯年卽名重海內。先輩中如錢辛楣王西莊程易田諸先生。皆推敬之。煦齋冢宰。見君易學。敍之以爲發千古未發之蘊。且集蘇文忠句書贈之曰。手植數松。今偃蓋。夢吞三畫。舊通靈。子琥能讀書。傳父學。端士也。

評曰。焦君與元年相若。且元族姊夫也。弱冠與元齊名。自元服官後。君學乃精深博大。遠邁于元矣。今君雖殂。而學不朽。元哀之切。知之深。綜其學之大指。而爲之傳。且名之爲通儒。諗之史館之傳儒林者曰。斯一大家曷可遺也。

李尙之傳

李銳。字尙之。一字四香。元和縣學生員。幼開敏。有過人之資。從書塾中檢得算法統宗。心通其義。遂爲九章八綫之學。古算術。至唐以後。幾於亡。明泰西利瑪竇入中國。有幾何原本一書。徐光啟李之藻之徒。從而演繹之。周官保氏九章之遺法。不能燭照數計也。李之藻同文算指。以西術易九章盈朒方程之說。梅

宣城定九謂非利氏本意。蓋中西術其理則同。而立法則異。三率比例。較古法方田粟米差分爲密而少。廣爲西法所無。是略而不備矣。宣城梅氏近世推絕學。以梅氏智計。豈有不知古法與西法不同者。第囿於西術。而九章算經諸書。皆未之見。所見者惟周髀勾股之法。雖欲深求古術。然苦無古籍。出於意測耳。李君起而振之。力求古學。王孝通緝古算經。詞隱理奧。無能通之者。君與陽城張君古餘。共著細草詳論二十術。而商功之平地役功廣袤之術。較若列眉矣。又於同邑顧君千里。得秦九韶九章算經。乃窮究天元一術。論其法與借根方不同。於是郭守敬李冶之說始明。知唐順之顧應祥之書甚無謂也。君嘗謂四時成歲首。載虞書。五紀明歷見於洪範。歷學乃致治之要。爲政之本。通典通考。置而不錄。不亦愼乎。因著歷法通考。其書體例。大略以顓頊夏殷六歷久矣。陳亡。記載咸缺。太初術本之殷歷。立法疎闊。三統術雖推法較密。然亦用太初四年增一日之術。是四分術無異於太初也。故斷自三統術始。至國朝之橢圓法止。唐瞿曇悉達九執歷。宋荆執禮會天歷。史志佚其法。乃於開元占經寶祐四年會天歷中求其術而爲之說焉。惜未成書。惟三統術注。四分術注。乾象術注。奉元術注。占天術注。日法朔餘強弱考六科而已。又有召誥日名考。方程新術草。勾股算術細草。弧矢算術細草。開方說。皆藏於家。君天稟高明。潛心經史。以唐宋人詩文爲雕蟲小技。不足觀也。然工四書之文。家居教學。從游者多登第。君則屢不得中。且蘭草未徵。曰炊頻夢。行自傷。得咯血疾。戚戚少歡。猶復靜心調攝。力疾著書。卒以此歿矣。元昔在浙。延君至西

湖按禮記正義。予所輯。疇人傳。亦與君共商榷。君之力爲多。嘉慶二十三年夏。江君子屏來嶺表。謂予曰。尙之歿矣。并述陽城張君之言云。元朱世傑。四元玉鑑。雖用天元一術。然葦草形正負之法。猝讀難通。因寄尙之。俾爲推究。二十一年。演成數段。寄至豫章。尋根推密。極爲精審。越兩月而凶問至。良可哀也。四元玉鑑。乃予藏本錄。以贈張君者。惜乎李君細草未成。遂無能讀是書者矣。君之子繼淑。書來求作傳。書中于君之世系行事及生卒年月不具。但云終於六月而已。今與江君共論之。姑舉所知者而爲之傳。君中年無子。以兄之子繼淑爲子。及三娶薛氏。始生一子。今尙在襁褓中也。悲夫。

擊經室二集卷五

嚴忍公子餐方貽傳

錢塘嚴杰通經術。余詰經精舍翹材生也。爲忍公先生之八世孫。子餐先生之七世孫。方貽先生之六世姪孫。生以其家狀請爲傳。遂合傳之曰。

嚴武順字忍公。明餘杭人。父大紀嘉靖乙未進士。官太常寺正卿。公補增生。入南京國子監。生而穎異。七歲爲詠蟲詩。輒驚人。及壯。與兄調御弟勅相師爲學。海內稱三嚴先生。武順學以正誼明道爲宗。尤究心於經世之務。諸史傳志得失成敗。制度沿革。靡不通其源委。善古文。詩。詞。篆。隸。行草。亦善皴別尊彝書畫。生平坦直。勇於赴人之急。守己嚴義利之辨。動以古人爲師。所著有古秋堂詩文集十二卷。鑑閣集四卷。讀史質疑二十卷。子沆。

沆字子餐。幼讀書。以孝聞。爲詩古文。浸沈六經史漢。爲西泠十子之冠。善射。命中無虛發。順治十二年進士。改庶吉士。御試第一。十三年。帝諭吏部庶吉士教習已一年。授爲科道。果有忠言讜論。始不負所學。沆授兵科給事中。沆疏言。臣蒙恩簡庶常。特授言職。正矢忠報效之日。伏念皇上側席焦勞。求治甚切。而諸臣督爲故常。因循諉卸。積弊不除。六部大臣。總司政紀。近遇大政會議。皆借端推諉。稽時廢事。請以後事

在某部。滿漢堂官先盡心參酌。詳列上陳。勅下廷議。可否裁定。請旨。卽關地方利病。亦不得輒譖督撫查議。致延時日。而卸職任。至諸臣條奏。因時變通。豈無足錄。亦當虛公酌量。不得執泥成規。止以無庸再議。塞進言路。得旨。所言是。嚴沆可謂不負作養。所疏議行。旋歷吏科。戶科。刑科。禮科。給事中。太僕寺少卿。兪都御史。宗人府府丞。左副都御史。沆在臺省。先後疏言。各省皆有經制額兵。又諸路遺滿兵駐防。互爲犄角。今遇警卽請禁兵。以致勞師靡餉。宜專責成各督撫提鎮標兵。精加選練。與駐防兵同心協勦。不得專藉請援。自疎職守。各省廢弁。宜令回籍。不得仍留舊地。蓄丁製械。南北水驛。不得借起運官物名色。橫索牽夫。攔截鄉民。充夫解役。僉解逃人。途次強住民房。需索構釁。請嚴行禁止。立限鋪遞。刊榜懸示。戶部。各差回部。例應考核。再准掣差。今往往惜掛欠之名。遲年餘未考核者。宜立限掣差。堂官親注冊。督撫請告。理宜候代。乃具疏後閉門養安。曠廢數月。宜嚴中飭吏部文選考功二司。宜擇有才望者調用。皆議行。十三年。疏云。大軍進征湖廣。川湖總督。不能兼制。請專設四川總督。從之。十月。授倉場侍郎。公試士以公明著。康熙丁酉。江南科場舞弊。各省舉人皆覆試。惟公所主山東試。奉旨不必覆試。己未。詔舉鴻臚科。朱彝尊。方象瑛。魏禧。皆公所薦舉也。十七年。卒於官。所著有北行日錄二卷。臯園詩文集四卷。奏疏十二卷。子曾渠。

曾渠字方貽。早傳家學。才識超越。善行楷書。康熙三年進士。由庶吉士授廣西道御史。十一年。補河南道。

御史在臺疏言。刑部民命。每奉有所擬太重尙輕之旨。卽此類推。凡六部各案。事同罰異。引例不當者更多。地方利病。下部題覆者。動稱毋庸再議。大抵滿漢司員多。而意見不一。始則議論參差。繼且因循推諉。及限期既迫。草率具奏。請嚴申飭。督撫保舉貢監吏員。異途出身人。請詳列居官政績。聽部察議。庶庸流不致冒濫。皆議行。十二年。以父任僉都御史迴避。十七年。丁父憂。二十一年。補江南道御史。二十八年。補右參議。尋轉遷鴻臚寺卿。三十年。遷通政使。十月。遷太僕寺卿。三十一年。遷副都御史。三十六年。授兵部右侍郎。三十九年。卒於官。公廉謹自厲。居官無所儲。歿之夕。幾無以爲殮。有詩文集四卷。

順昌縣訓導伊君墓表

君諱應聚。字文起。號清泉。爲商阿衡之苗裔。世居汴州陳留。陳留有古莘城。唐末諱顯者。入閩至寧化居焉。二十世至清泉君。君明諸生。君生明季。入本朝。由生員歲貢入成均。選順昌縣訓導。時值耿逆之變。有僞劉將軍者。擾郡縣。劫君使從逆。君誓死不爲勳。笞榜極苦。卒不能屈。以免於難。康熙中年。天下無事。有司舉賓筵之典。君三爲鄉飲正賓。卒於康熙辛卯十月二十。有六日。年八十有三。葬城西謝家科。娶陰宜人。管宜人子爲皇。爲舉生經邦。縣學生。經邦生朝棟。乾隆己丑進士。刑部安徽司主事。官至光祿寺正卿。貤贈君奉政大夫。又數十年朝棟子秉綬。復以己酉進士。刑部郎。知揚州府事。於戲。君以校官值變。守正不屈。大節如此。卓然傳矣。細行雖不書可也。

瑞州府學教授浦亭阮公墓表

公姓阮諱湖字少川號浦亭先世系出晉陳留阮瑀瑀後遷巴陵宋名子宗者始遷新建名達者宋承事郎名宣名簡者皆宋進士簡官祕書省校書郎簡七世孫子升徙忠孝鄉之竹山又八世爲公會祖士藻績學不仕祖嗣中縣學生父龍光乾隆庚午舉人知河南通許縣擢湖北黃州府同知有惠政公幼聰穎善屬文試輒高等以第一人補廩膳生壬子中式副榜就教諭職歷署餘干縣學教諭廣信瑞州府學教授所至以造士爲己任慮民間孝節爲吏所壅乃親諭各鄉舉報之餘干之俗奸民貸錢於生監之富者不遂輒撫事訟之學公曰生果惡當訟之縣令訟之學圖傳訛洩忿耳擲其詞俗乃變廣郡旱隨知府集紳士減價糶穀民以安公子爲選及兄子爲暄爲昆爲景等皆先於公中式舉人公以甲子科始中式舉人乙丑會試不第閏六月五日卒于京師年六十歸葬於新建公性孝弟母丁宜人疾侍藥衣不解帶父卒於官致哀毀扶柩歸伴宿三年卜葬地北極西山南至瑞河足跡遍百里跋涉寒暑蓋其慎也新建阮氏族譜無專書公明世系辨昭穆支分而總輯之譜成曰松湖族譜告之祖考構屋於省城爲試館名曰雲溪別墅後堂祀同知公象曰念德堂子孫應試者咸居讀焉子姪讀書者公終年約之在塾戒毋外遊毋習浮靡書馬伏波誡兄子書于座右其視諸兄之子猶子也嘗語人曰吾不愛兄子是棄越吾兄也且自吾父吾祖視之皆孫也疎之非祖父志也誠子弟曰爾曹勿營私吾兄弟蒙祖父澤只知有骨肉不知

有財利。皆之言也。竹山阮氏無祖祠。公度地興工。構祠堂。甚宏敞。祀始祖。始遷祖于寢室。各房小宗。以次附於東西廳事。復立四室。分祀儒學。官績。孝義。文藝。置田五十畝。爲奉祭祀課子弟讀書之用。祠右半畝。園建雲溪書院。爲子姓讀書地。名其軒曰靜軒。取濂溪主靜之意。撰鏡心銘質二銘。揭于東西廂。諸遠祖。墓皆立碑。時修飭之。輯高祖以上遺文。及曾祖老閒居士詩古文。祖六閒子集等編。爲阮氏流芳集。老閒居士舊殯于宅前琉璃岡。公于其地建祠。專祀曾祖祖父三世。統名曰司馬祠。又於父皇封岡墓建廬十餘楹。爲展墓止宿之所。事諸兄盡弟道。手足相依。雖白首如童時。所著有古今體詩餘千吟等集十八卷。病于京邸。猶作文雉賦以見志。妻唐孺人。生爲邇。嘉慶戊午舉人。揀選知縣。繼妻劉孺人。生爲昇。爲昂。皆幼讀書。孫一。孺僑。爲邇子也。公蒙先業。飭祠墓。奉祭祀。修譜牒。教子姪讀書。皆有成。可謂孝義矣。偶爲校官。輒盡其職。使治民。常若何。然觀其諸所設施厚矣。後之子姓。當更有大其宗者。

吾阮氏明季自淮安遷揚州。明初自江西清江遷淮安。溯其始。則自陳留阮瑀後遷湖廣巴陵。宋由巴陵遷新建。復遷清江。雖元明兩遷。譜系失考。不可妄續之。然新建阮氏。固吾宗也。嘉慶十年冬。同姓孝廉爲邇。奉其考浦亭公柩過揚州。相弔焉。明年孝廉以公狀來乞銘。元方居憂。不爲韻語。十二年再祥。乃寄文表其墓如右。

翰林編修河東鹽運使司沈公既堂墓志銘

運使沈公諱業富字既堂。元代由吳興徙高郵。明代遷貴州普安。官河南按察副使。奕琛者。復歸高郵。曾祖弼。官廣東高州府知府。遷儀徵。祖文封。遷江寧。父之亮。徙揚州府城。公猶以高郵通籍。祖父皆贈如公。官公幼穎異。好學。雷學使鑑始拔之。年二十二。舉于鄉。次年成進士。改庶吉士。習國書。有謂公早達爲倖者。里巷擊柝者曰。吾每當子夜風雪時。過沈氏書樓。未嘗不聞讀書聲。何倖也。越二年散館。授編修。撰制誥。文辦院事。庚辰充江西副考官。壬午充山西副考官。乙酉分校順天鄉試。皆以先正法衡文。得士爲盛。尤屏絕聲氣。關節不通。館譽重之。前後充國史館續文獻通考館纂修官。乙酉冬補安徽太平府知府。掌院劉文正公曰。纂書之勤。無如君者。欲留公京秩。未果。公久于太平府任者十六年。于災眚尤盡職。己丑大水。城野成巨浸。公隨布政司坐浴盆。經行邨落。公曰。太平昔年賑多者三四萬口。今非五十萬口不可。賑乃大行。常塗縣大官圩決。公夜半至。見遠邨肆奪。火光銃聲不絕。公自爲密札十。下各官圩。勸富家糶濟。曰。本邨人面相識。鄰邨卽路人矣。今當各保各邨。毋轉掠。轉掠是圩皆路人也。互相殺。能保富乎。今密札不顯諭者。別有以靖之也。有告某富家不糶者。笞械之。曰。汝奉何明文令富家出粟耶。民始定。糶濟大行。總督聞之。下其法于他郡。辛卯秋。泗州水。撫部裴公知公賢。檄治其賑。公釐戶口之弊。民受其惠。乙未旱。禱雨無應。爲文哭祀社稷木主。卒得雨。庚寅大疫。設藥局瘞局。絕葷祈禳。民乃寧。前後課各邑種柳數百萬株。官路綠陰。相接成幄。督理暴露十餘萬棺。有一邨同時舉數百棺。前明之棺尙在者。民始而譁。及

見其親之骨。感泣曰：非府君教督不至此。戊子割辦妖妄案起，羽檄紛馳，捕搜徧各郡，獨太平不獲一人。有誣者，立出之。上司責公，公曰：本無奸，曷捕焉？蕪湖有兄弟訟者，公察其詞，出一手，杖主訟者，兄弟悔悟，友善如初。當塗有師弟互以陰事訐者，公取火盆置案前，卷盈尺，遽火之曰：爾等詞必有稟，可上控。曰：郡守焚案，不汝斬也。師弟皆泣，訟乃息。貴池有以墓地訟于部者，塵案山積，公夜視舊牘，得成化二十一年閏四月官契，公謂愚民安知閏，檢明史七卿表，得是年閏四月文，遂據以定其讞。公治郡，資最深，每考績，輒有足之者，或勸赴省，公曰：求之得，可恥也，不得更可恥也。逮辛丑，始授河東鹽運使，純皇帝所特簡也。河東鹽池，受淡水歛產，商運蒙古鹽，多勞費，及鹽盛產，而弊益多，商益乏。公曰：鹽池自古爲利，不當革。若聽民自販，必致蒙古鹽內侵，商人之力，不在寡在不均，其弊有三：奸商棄瘠據肥，一也；費浮地遠，火攫其利，二也；簽代之期，貧富倒置，三也。乃立均引順路之法，總三省引地，以三等均之，復以道路相近者，順配爲五十六路，路各一籤，令各商圖分籤掣之。於是賂絕而弊不行。洎乾隆六十年後，廢商運，蒙古鹽內侵，嘉慶十一年，復舊制，皆如公所預燭者。公所蒞，皆興學愛士，修書院，習樂舞，運司署西隙地，仿鄉場號舍，立四十舍，月課諸生。才人黃景仁，歿于山西公署，公經其喪，厚其賻，送其柩歸常州。海內高其義，事母以孝聞。在晉甫一年，以母老宜奉歸，請終養，撫部不許，固請，乃許之。俄而湖北陸撫部有凡官親老者，勸令終養之議，撫部曰：非一月前入奏，今無以對子矣。公曰：但得終養，卽勒歸無憾也。母卒，喪以禮，服闋，以溼

疾恬然不復出居鄉十餘年多善舉里黨皆曰沈公乃正人所著有味鐙齋詩集若干卷文集若干卷公生于雍正十年五月二十二日卒于嘉慶十二年八月十五日公子在廷以十三年某月支葬公于某某山之原配鄭淑人耐焉子一在廷癸卯舉人內閣中書女一適工部郎中裴正文孫二勤增太學生員次勤植元昔以長女萃字之余女孀勤植亦未冠卒公與先大夫友善且爲姻家故公子屬元爲銘銘曰公文在經公學在性忠厚其心砥礪其行拙于成宦勤于從政飽民之饑療民之病以史斷獄以道出令苦鹽既調澹泊無競以孝辭職壹志溫清既享其壽乃歸其命藏此佳城積善餘慶鄉里私諡僉許曰正

默齋張君誄

詒經精舍生烏程張鑑通經博覽善詩古文佐予書記者有年矣嘉慶十一年丁父憂十二年秋述其父之言行以示予予謂立言爲三不朽之一禮蔑一言可知其賢今張君之言善是宜傳而爲之誄也君諱德全字聚東號默齋國子監生父元熙爲長生會育嬰堂諸善舉君繼之勿替每出遊閉月一歸鐙下爲鐙講柳州小記馬伏波誠兄子書韓昌黎寄符城南讀書詩談古今忠孝事至漏三下不止嘗訓鑑曰凡人爲忠孝事不獨身名俱泰卽祖若父亦蒙其榮否則里閭恥談其姓氏而行路之人唾棄之故心術不可不謹也又曰爲善之大小有不同其存乎心者則一余生平不自知其善與否然未嘗爲惡昔范孟博臨終與子訣曰吾欲使汝爲惡則惡不可爲吾欲使汝爲善則吾不爲惡此雖有激之言終與聖人樂善

之旨有間。汝宜思之。君以同學計魚計學行淵雅。命鑑從之。學或不進。卽怒之。嘉慶辛酉。鑑選拔貢生。從諸城劉侍郎入都。君教之曰。此行遇合有命。任事不可不謹。汝身安則我心安矣。鑑試畢旋里。予招入幕。君教之曰。食焉勿怠其事。汝鮑旃甲子鑑中副榜舉人。十一年。從予在揚州。冬君病。鑑奔歸。得順風一晝夜行四百里。抵家治湯藥。逾數日乃歿。年七十有八。著八詠樓吟草四卷。君善醫。著桐雷歌訣二卷。誄曰。

惟忠與孝。祖父榮。聖賢樂善有令名。嗚呼張君言之而能行。

知不足齋鮑君傳

乾隆三十八年。高宗純皇帝詔開四庫館。采訪天下遺書。歙縣學生鮑君廷博。集其家所藏書六百餘種。命其子仁和縣監生士恭。由浙江進呈。旣著錄矣。復奉詔還其原書。其書內唐闕史及武經總要。皆聖製詩題之。皇上御製內府知不足齋詩云。齋名沿鮑氏。闕史御題詩。集書若不足。千文以序推。注云。齋額沿杭城鮑氏藏書室名。乾隆辛卯壬辰。詔采天下遺書。鮑士恭所獻。最爲精夥。內唐闕史一書。曾經奉藻題詠。嗣後其家刊刻知不足齋叢書。以唐闕史冠冊。用周興嗣千文以次排編。每集八冊。今已十八九集。可爲好事之家矣。嘉慶十八年。方公受疇巡撫浙江。奉上問鮑氏叢書續刊何種。方公以續刊之第二十六集進。奉上諭生員鮑廷博。於乾隆年間恭進書籍。其藏書之知不足齋。仰蒙高宗純皇帝寵以詩章。朕於

幾暇亦曾加題詠。茲復據浙江巡撫方受疇代進所刻知不足齋叢書第二十六集鮑廷博年逾八旬。好古績學。老而不倦。著加恩賞給舉人。俾其世衍書香。廣刊祕籍。亦藝林之勝事也。元按君字以文。號淥飲。世爲歙人。父思詡。居于浙。娶于胡。胡卒。又娶於仁和顧生君。君幼而聰敏。事大父能孝。念父遊四方。恆以孫代子職。得大父歡。大父卒。既葬。君父攜家居杭州。君事父又以孝聞。以父性嗜讀書。乃力購前人書以爲歡。既久而所得書益多。且精。遂哀然爲大藏書家。自乾隆進書後。蒙御賜古今圖書集成。伊犁得勝圖。金川圖。四十五年。南巡狩。迎鑾獻頌。蒙賜大緞二疋。疊膺兩朝異數。褒獎彌隆。君以進書受知。名聞當世。謂諸生無可報稱。乃多刻所藏古書善本。公諸海內。至嘉慶十八年。年八十有六。所刻書至二十七集未竣。而君以十九年秋卒。遺命子士恭繼志續刊。無負天語之褒。君勤學耽吟。不求仕進。天趣清遠。嘗作夕陽詩。甚工。世盛傳之。呼之爲鮑夕陽。元在浙常常見君。從君訪問古籍。凡某書美惡所在。意指所在。見于某代某家目錄。經幾家收藏。幾次鈔乘。真僞若何。校誤若何。無不矢口而出。問難不竭。古人云。讀書破萬卷。君所讀破者奚翅數萬卷哉。

武進臧布衣傳

布衣姓臧。名繼宏。字世景。晚號厚菴。先世山東東莞人。遷浙江長興。復遷江南武進。曾祖琳。祖晉。父兆魁。幼貧困失學。冬寒無厚服。日得四五錢以爲食。及長。助人理業。誠謹勤篤。稍能自給。乃力舉先代五殯。卜

葬。孺慕以終其身。族之無嗣者繼之。寡者瞻之。孤女嫁之。負貸者代償之。嘗旅行遇虎。見覆舟。皆無懼色。蓋有以自恃也。生子四。鏞堂、鯉堂、禮堂、岷堂。卒于嘉慶元年。春秋六十有九。布衣殆敦孝友。篤行于鄉里者歟。然而布衣之曾祖玉林先生。經學大儒也。學與太原閻百詩、徵君齊。徵君稱爲隱德君子。所著經義雜記三十卷。尚書集解一百二十四卷。大學考異二卷。知人編三卷。困學鈔十八卷。水經注纂三卷。皆未傳于世。布衣篋藏之。不失片紙。命其子鏞堂、禮堂。從餘姚盧召弓學士遊。勗以經術。不期以科名。遂通九經三史。尤明小學。乃命啓其篋校錄之。曰。四世相傳之業。勿自我而墜。足慰先人于地下矣。嘉定錢辛楣少詹事。金壇段若膺大令。見之歎曰。此漢唐儒者之學。不刊之書也。然則非布衣能守先緒。啓後學。不及此。吾是以論而著之。

孫頤谷侍御史傳

孫君名志祖。字詒穀。字或作頤谷。號約齋。仁和人。乾隆丙子舉人。丙戌二甲進士。分刑部。補山東司主事。由員外郎陞雲南司郎中。欽差通州坐糧廳。擢江南道監察御史。乞養父母歸里。復少宦情。不復出。以著書爲事。嘉慶六年。掌紫陽書院教。二月二十九日。以疾卒。年六十有五。侍御性孝友。雅近和平。生而穎悟過人。得毛西河全集。鏡下讀之。不寐累夕。凡讀經史。必求釋其疑而後已。同時全謝山、杭堇浦、厲樊榭、張曉亮諸君子。皆相與賞難。以益所學。以解經見重於督學汀州雷公。補附學生。其舉于鄉也。禮部侍郎武

進莊公策問李鼎祚周易集解。惟侍御對最詳。其以第六名中式禮部也。工部尙書新建袁公試詩黍稷與與文。惟侍御以黍稷分比。數典不素。凡此皆稽古之力。無所愧于科名。任刑部時。于庶獄必察。至再三精覈。與其治經史同。管糧務。革陋規。以公治之。軍民稱便。居族黨。重然諾。施予無德色。嘗云。但願一生常助人。不至求人助。亦幸矣。侍御幼寡。嬉戲。所樂讀書而已。羣經文選。成誦易而熟精其理。似素所習者。卒之前歲。病中夢金碧樓殿。榜字非民間所有。又夢見故友涪鹿泉先生。握手曰。來日苦少。豈非天性和正。讀書多而爲政舉。吳越間固多靈氣。其生也。有所秉。其死也。有所歸歟。侍御所著書。有家語疏證六卷。謂王肅作僞難鄭。誣聖背經。既作聖證論以攻康成。又僞撰家語。飾其說以欺世。因博集羣書。凡肅所剽竊者。皆疏通證明之。如鞠盜之獲真藏也。其有功于鄭氏似孫叔然。文選考異四卷。據潘稼堂何義門諸校本。參稽衆說。仿朱子韓文考異之例。以正俗本之誤。文選注補正四卷。仿吳師道校國策之例。輯前賢評論及明畫商榷之說。以補李注所未及。又輯風俗通逸文一卷。又補正姚之駟輯謝承後漢書五卷。讀書陸錄七卷。考論經子樸家。折中精詳。實事求是。不爲鑿空武斷之論。愍然如其爲人。又謂孔叢子亦王肅僞托。其小爾雅乃肅借古書以自文。作疏證辨其妄。惜未成書。又陸錄續篇亦未成。侍御無子。以兄景曾子同元爲後。同元好學能文。得侍御教。傳其家法。

四川廣安州知州阮君臬表

君諱和。字煦初。江西新建人。系出晉陳留阮瑀。自陳留徙巴陵。宋徙新建松湖鎮。明遷竹山鎮。父龍光。乾隆庚午舉人。官通許縣知縣。擢黃州府同知。有循聲。君讀書有才略。少隨父任。習民事。甲午遵川運例爲知州。試用之四川。丙申署天全州印。又署會理州印。會理居蜀邊。夷獠雜處。士司講悍。互吞并。君以德感之。皆帖服。丁父憂去官。民哭之。爲立碑。辛丑服闋。仍赴川。署天全州事。調署雅州府軍糧同知。統轄漢土官兵。兼爐關稅務。綏理番夷藏驛。事皆無誤。癸卯實授廣安州知州。甫下車。卽革搶穫移屍諸惡俗。州城多傾圮。君捐俸倡修之。東南隅當渠水衝。以石隄捍之。城中少水。君浚塘注水。以澆火災。倉穀書院。次第經營。屢決大獄。無冤縱者。癸丑調署汶川縣事。又署雲陽縣事。雲陽多險灘。廟旣東陽尤甚。舟行易溺。君鑿石平之。嘉慶丙辰。大寧邪賊起。廣安民日夜望君回。總督亦以川東北緊要。檄君回廣安。九月。達州邪教王三槐等倡亂。往來鄰界。君獻議大帥曰。達州邪匪。勞動王師。川東北民。受害已不小。茲復竄擾嘉陵江以西東鄉太平等處。賊聚黨橫行。隘口水次。更須嚴防。卑州境內。現設寨八十四座。大寨約三五千戶。小寨五七百戶。及千餘戶不等。卑職傳諭各寨首。聯五六寨爲一團。同團以二十里爲度。按戶挑壯丁一名。每月操鎗一次。如有賊圍攻。彼此互援。辦理已有成局。又古制寓兵於農。今似可仿行。查卑州額征糧五千餘石。按糧一石二斗。僱募健勇一名。每名全年酌給工價鹽菜錢二十千。著令糧戶公捐。每糧一石攤捐錢一千七百。卑州約得鄉勇四千名。遵照兵制操習行伍。慎選舉貢生監爲領隊。逐日操演。軍器由

官捐備火藥赴局支領。並請委武弁六員。來州教習鎗箭。敵愾禦侮。事竣論功行賞。文武領隊。以爵秩議敘。鄉勇或准作武生。或酌賞銀。自當人人奮勇爭先。如此以逸待勞。似可事半功倍。若川北川東州縣。均能一律辦理。則處處有義兵截殺。逆賊無所逃遁。首惡既誅。黨羽必散矣。奉大帥准行。乙卯王三槐兩入境。皆以防堵嚴密去。丙辰五月。又來州屬之金山場青崗場。君率士勇禦之。乃折回大竹梁山而逸。六月。川賊冉文儒。陝賊張漢潮等。由清溪場逼州境。徐添德又由大竹鄰水入州焚掠。八月。王光祖由大溪口竄入河東。九月。張添德張子聰徐添德冷添祿各賊。分竄州境之河東西焚擾。君令寨民竭力防守。城不可攻。野無所掠。賊知廣安嚴相戒勿犯。州北老鷹巖者。峭壁高州城數倍。中開一窩。約十餘里。君曰。此造物設險以護人。若棄不守。必爲賊據。賊據則挾建瓴之勢以臨我。州城危矣。乃函商之樓尉集紳耆。召匠築堡。於是鄉民移居者踵相接。爲錫名曰安居城。州城由是益固。而民間牛馬器具糧食。益有所屯積矣。己未四月。冷添祿入境。君督鄉勇對壘三日。賊不退。乃請參贊額侯督兵來州。殲冷賊於石笋河。餘黨戮殆盡。大帥入告。額侯復爵。而君名旁奉硃圈軍功議敘。加二級。自後張子聰張添祿包正洪以及各賊竄入境者。不下二十餘次。莫不望風走。自丙辰至庚申。凡五載。廣安獨無恙。皆君設策保護功也。是歲護理順慶府知府事。總督勒公以君團練得法。通飭各州縣遵照辦理。曰。毋讓阮牧獨爲好官。辛酉五月。州民張老五李合等。以阻米起畔。聚衆滋事。君率壯丁親往捕治。外委王家元被賊戕。并斃役十餘名。張老

五李合自稱元帥。總督發兵勦捕。殺賊一百餘名。生擒一百五六十名。張老五李合藏山林。君懸重賞。鼓勵寨民搜山。親擒首逆張老五。餘悉平。奏上。奉上諭。知州阮和不能先事防範。本有失察之咎。但首逆張老五係其親自拏獲。功過尚足相抵。加恩免議處。君因勞勩。年齒衰邁。遂告退。君治廣安。前後十六年。署他州縣六年。一本其父治通許者治之。而在廣安。疊遭賊擾。艱難又復過之。乃履險如夷。卒能全城全百姓。皆盡心愛民所致也。去廣安之日。士民如失所怙。送者數百里。始返。歸祀家廟。垂涕久之。凡祖墓歲必再三至。視其罅漏。察其燥濕。事父孝。夜嘗爲父煖足。父母遺象。朝夕拜之。有微物必獻。每視象若有憂喜色者。輒應休咎。素惡分爨。曰。吾雖不能爲張公藝。姑待吾沒世可也。嘉慶九年夏病卒。年七十有四。葬于某某之阡。以軍功遇厚恩。授奉直大夫。父母如其陪。妻夏氏。繼妻梁氏。子三。長貽昆。辛未進士。翰林院庶吉士。妾葛氏出。次綬。江都縣丞。次爲昂。國學生。並梁氏出。嘉慶十六年。貽昆在京師。乞元表君墓。元之先。自元末明初系出江西。爲同姓。遂載筆焉。

誥封奉直大夫翰林院編修陳君墓志銘

君諱鶴書。字東麓。先世居閩泉州。曾祖式瑣。遷福州閩縣。祖應瑞。父起龍。皆以農業佐儒術。起龍補縣學生。君幼穎異。家貧。雄于文。試輒高等。朱文正公。紀文達公。王文端公。在閩。皆賞拔之。累不舉于鄉。補歲貢生。教授鄉里。生徒衆多。嘗主講仙遊龍巖邵武漳平上杭書院。皆有經法。弟子多舉科名者。君恂恂端謹。

守身如玉。質直好義。交不逆詐。詩集數卷。古體冲淡近陶章。今體綿婉近白陸。嘉慶十五年七月壬支卒。年六十有五。以子壽祺官得封。妻亦封宜人。子三人。壽祺己未進士。翰林院編修。文淵閣校理。國史館總纂。京察一等。記名御史。壽口壽口。皆儒業。壽祺幼被父教。文藻博麗。規畫揚馬。通達經傳。精究小學。康熙己未乾隆初年。皆有鴻博科。儒術爲盛。嘉慶己未。雖非制科。然如張惠言王引之壽祺等。擢之前人。似無訛也。顧壽祺之學。皆出于其父之教。然則君之所學可知矣。壽祺爲元門生。在都聞訃。星奔歸葬。來請銘其墓。銘曰。

君行肫誠。君學通明。匪有金在。簾而教子。惟經。子顯揚其名。名重者勢輕。山靈氣清。鬱鬱乎佳城。

誥贈中憲大夫山東兗沂曹濟兵備道一鳳孫公暨妻許恭人墓表

公諱枝生。字一鳳。氏曰孫。先世定遠人。明初有諱興祖者。以佐命功。封燕山侯。侯之從子。諱繼達。以行省都鎮撫守禦常州。賜田宅。是爲武進孫氏。凡二侯三指揮使。登庶司者百人。尙書慎行尤以清望著。其傳世與明相始終。公會祖餘。封翰林院檢討。祖自儀。桂陽州同知。封翰林院編修。父謀。康熙辛未科進士。禮部主客司郎中。禮部公清官家貧。既沒。公尙幼。其從兄鳳飛。官廣西州吏目。公以諸生從之。廣西賢于許氏。公念門戶中衰。二親早棄養。綴身妻家。非學無以自立。乃下帷讀書。刻苦無閒晷夜。體素羸。遂致疾。雍正九年四月壬子卒。年厘二十有六。嗚呼。公以望族丁衰祚。讀書勵行。天不假以年。無事業著述。表見于

世微乎微矣。然公之子若孫。以學行擢科甲。名滿天下。交遊稱之。非公之隱德餘蔭。曷克及此哉。公妻許太恭人。以嘉慶十年六月辛未卒于其孫山東糧道任所。春秋九十有八。距公之卒。蓋苦節七十五年矣。太恭人以二十三歲而寡。乾隆二十四年。奉旨旌表節孝。今之節母。且致上壽。未有如太恭人者也。太恭人父建。宜興人。以舉人官廣西義寧縣知縣。無子。欲爲太恭人擇壻。見公于鳳飛家。器異之。以爲館甥。二年生子。又二年一鳳公卒。義寧君欲奪太恭人志。而以公之子爲許氏後。太恭人誓且泣曰。女何不若兒孫氏一綫不可絕。父無子。我當祀許于孫氏。義寧君知不可奪。從之。旋卒。太恭人以一婦人自粵西奉父及夫之棺以歸。陟嶺嶠。浮湘湖。山林叢密。風波險惡。猿啼于晝。鬼獻于夜。太恭人抱孤子以泣。顛連修阻。卒達江左。奉義寧君棺葬于宜興。遵公遺言。厝棺于夾巷祖墓。母病。侍藥不解帶者五月。喪如父禮。以贈嫁陽羨田。易田于常州爲祭田。奉春秋祀事。又以子官俸。置祀田于宜興。歸之許氏宗祠。孫氏歲時祭祀。必兼祀義寧君夫婦。以至于今。太恭人性矜嚴廉儉。不苟言笑。不拜佛誦經。年近百齡。每奉壽觴。必戒曰。吾食半孟飯。卽飽。製一衣著數十年。無受屬吏金幣爲也。方太恭人之初歸江南也。先人敝廬屢二開有半。炊煙滿梁。太恭人晨夕操作。紡織鍼黹。以易食。夜篝燈課子讀書。子有過。必責之。責必哭。教孫學。亦如之。嘗反鍵書室。自牖納食。故學行迄有所成。嗚呼。方在粵西。孫氏之系不絕如縷。非太恭人矢志撫孤。力貧教學。又曷克及乎此哉。公子名勳。中乾隆癸酉科舉人。句容縣教諭。截取河曲縣知縣。署渾源州直隸。

沁州事。孫三人。長星衍。乾隆丙午舉人。丁未科一甲第二名。賜進士及第。授翰林院編修。改刑部主事。陞郎中。授山東兗沂曹濟兵備道。署山東按察使。今官山東督糧道。次星衡。河南候補縣丞。署洛陽縣典史。次星衡。直隸候補布政司經歷。署安州州判。一鳳公初以子官勅贈修職郎。句容縣教諭。後以孫官誥贈奉直大夫。刑部直隸司主事。前翰林院編修。晉贈中憲大夫。山東兗沂曹濟兵備道。太恭人初勅封太孺人。晉封太宜人。太恭人嘉慶十年冬。附葬一鳳公墓。墓在常州府某地之原。

誥封奉政大夫掌陝西道監察御史歲貢生游君嘉表

君諱晟。字若李。號旭軒。先世出鄭世叔。唐末遂。始自固始從閩王入閩。至宋文肅孫桂。又自建陽至長樂。康熙間高祖鍾元。爲耿逆所掠。遂家福寧。著籍霞浦。曾祖勝岳。生員。早卒。祖增州。鄉飲賓。父煒。生員。以孫貴。誥贈奉政大夫。母程宜人。晚生君。故尤鍾愛。年十八。始鄉學。下筆驚其長老。試輒冠其曹。屢爲學使者所器。然卒不遇。以明經老。君性孝。侍贈公病。無倦容。祭必泣。素不習青烏家言。以葬贈公。遂通其說。母程晚喜飲酒。左右必盡歡。有女弟早寡。割宅宅之。爲之立後。居平課其子極嚴。光瓚成進士。歸令授徒。禁與外事。將謁選。則教之曰。吾上世皆積行累善。汝無以吏事害其家聲。旣而選漳州教授。則又諭之曰。師道立則善人多。汝勉旃。迨叔子光繹。以進士官翰林。歲必以金畀之。曰。詞臣清貴。毋以貧傍人門戶。及爲御史。以事降官。君乃亟命之歸。晚尤愛交友。種花果。坦白無城府。暇則爲文酒之會。談先世勤儉孝弟。則聲

豐不倦。年七十有二。自營生獮。時儼之司空表聖。嘉慶十年閏六月五日卒。年七十有九。例授修職郎。勅封儒林郎。翰林院編修。曾封奉政大夫。娶王宜人。繼葉儒人。子四。光縝。庚子進士。福州府學教授。光繼。勅封儒林郎。光釋。己酉進士。翰林院編修。掌陝西道監察御史。皆王出。光縝。葉出。孫六。大釗。大鎔。皆廩生。大銓。大琛。皆附生。大芳。大謨。

